

고송집(孤松集)

신흥망(申弘望)

2022-11-11

鵝洲申氏 시조바로세우기 協議會

申有植(신유식)

고송집(孤松集) 신홍망(申弘望)

형태서지

권수제	고송집(孤松集)
판심제	고송집(孤松集)
간종	목판본(木版本)
간행년	1740년 간행
권책	원집(原集) 3권, 부록(附錄) 2권 합 2책
행자	10행 18자
규격	18.8×15.0(cm)
어미	上下三葉花紋魚尾
소장처	국립중앙도서관
소장도서번호	한 46-가 1722
총간집수	한국문집총간 속 28

저자

성명	신홍망(申弘望)
생년	1600년(선조 33)
몰년	1673년(현종 14)
자	망구(望久)
호	고송(孤松)
본관	아주(鵝洲)
특기사항	장현광(張顯光)의 문인. 이정기(李廷機) 등과 교류


행력

왕력		서기	간지	연호		연령	기사
선조	33	1600	경자	萬曆	28	1	5월 7일, 태어나다.
인조	2	1624	갑자	天啓	4	25	부친상을 당하다.
인조	5	1627	정묘	天啓	7	28	진사시에 합격하다.
인조	16	1638	무인	崇禎	11	39	行薦으로 康陵 參奉에 제수되었으나 나아가지 않다.
인조	17	1639	기묘	崇禎	12	40	別試文科에 합격하다.
인조	22	1644	갑신	順治	1	45	4월, 승정원주서 겸 춘추관기사관이 되다. ○ 82세 된 노모를 봉양하기 위해 사직을 청하여 허락을 받았는데, 임금이 藥材와 부채를 하사하다.
인조	23	1645	을유	順治	2	46	2월, 소명을 받고 漢江에 이르렀는데 체차되었다는 소식을 듣고 돌아오다. ○ 〈赴召命到漢江間遞即回程〉 시를 짓다.
인조	24	1646	병술	順治	3	47	전적, 병조 좌랑, 사간원 정언, 예조 좌랑이 되다. ○ 관직을 버리고 귀향하다.
인조	25	1647	정해	順治	4	48	가을, 정언이 되다. ○ 노모를 위해 부친의 遺蹟이 있는 全州 判官이 되어 가다.
효종	1	1650	경인	順治	7	51	모친상을 당하다.
효종	3	1652	임진	順治	9	53	가을, 사헌부 지평이 되다. ○ 李時樑가 사직상소를 올리면서 先賢들을 모욕한 것에 대해 탄핵하였다가 黨論을 짓는다는 이유로 26일동안 平海에 付處된 뒤 석방되다.
효종	7	1656	병신	順治	13	57	겨울, 蔚山 府使가 되다.
효종	10	1659	기해	順治	16	60	봄, 豊基 郡守가 되다.
현종	4	1663	계묘	康熙	2	64	강원도 도사가 되었으나 곧 체차되고 성균관 사예가 되다.
현종	5	1664	갑진	康熙	3	65	종부시정 겸 춘추관편수관이 되다.
현종	12	1671	신해	康熙	10	72	승문원 판교가 되었으나 나아가지 않다. ○ 부인 永川李氏의 상을 당하다.
현종	14	1673	계축	康熙	12	74	1월 22일, 집에서 졸하다. ○ 義城縣 下川 黑石리에 장사지내다.
영조	16	1740	경신	乾隆	5	-	목판으로 문집을 간행하다.

가계도

15세 홍망(弘望) 父 : 지제(之梯) 祖父 : 몽득 (夢得)귀파(龜派)

오봉공파(梧峰公派)



편찬및간행

저자의 유문은 저자의 부친인 申之梯의 「梧峯集」과 동시에 간행되었으며 문집의 편차 또한 동일하다. 신지제의 증손 申叔範이 李惟禕(1625~1701)에게 신지제와 저자의 家藏草藁를 가져가 校讐를 부탁하였는데, 이 유장이 일을 마치지 못하고 졸하여 편찬 사업이 중단되었다. 이후 1736년에 저자의 증손 申震龜·申夏龜 등이 두 사람의 유집을 간행하기로 결정하고, 1737년 봄에 신하구가 趙德鄰(1658~1737)에게 編次를 부탁하려 갔으나 마침 조덕린은 모함을 받아 待命 중이었으므로 유고를 가지고 그대로 돌아왔다.

1738년에 藏待書院에 모여 다시 유집의 간행을 추진하기로 결정하고, 그해 겨울에는 신하구가, 1739년 봄에는 신진구가 李光庭(1674~1756)에게 번갈아 부탁하여 유집을 각각 校正받고 序文도 받았다. 여기에 誌, 銘, 行狀과 신진구가 지은 後識, 權相一(1679~1759)이 지은 跋文을 각각 붙여 族姪 申致雲에게 繕寫하게 하였고, 1740년에 藏待書院에서 木板으로 간행하였다.

본서에는 刊記가 따로 없으나, 함께 간행된 「梧峯集」에 “庚申仲春藏待書院開刊”이라는 刊記가 있는 것으로 볼 때, 같은 시기에 간행되었을 것으로 생각된다. 《초간본》이 본은 현재 국립중앙도서관(한46-가1722), 규장각(古3428-367), 연세대학교 학술정보원(811.98/신흥망) 등에 소장되어 있다.

본서의 저본은 저자의 증손 申震龜·申夏龜 등이 1740년에 목판으로 간행한 초간본으로 국립중앙도서관장본이다. 본 影印底本 중 附錄 上의 제3판은 落張이므로 同一本인 연세대학교 학술정보원장본으로 補充하였다.

序(李光庭 撰), 後識(申震龜 撰), 跋(權相一 撰) 등에 의함

구성과내용

본집은 원집 3권, 부록 2권 합 2책으로, 卷首에 李光庭이 쓴 序文이 있고 目錄은 없다.

권1~2는 詩로, 저자의 詩 156題가 詩體 구분 없이 저작 연도순으로 편차되어 있다. 주로 수창한 사람은 趙松年, 李廷機, 沈澂, 申濡 등이다. 만시는 趙亨道, 李民成, 申楫, 孫胤業, 趙咸英, 申志道, 李弘祚, 鄭伋, 金震遠, 趙遵道, 金應祖, 南海準 등에 대한 것이다. <赴召命到漢江聞遞卽回程>은 1645년 임금의 소명을 받고 도성으로 가던 중, 한강에 이르러 체차되었다는 소식을 듣고 돌아가면서 지은 것이다. <送子愼觀月城>은 벗 李廷機가 生父인 紫巖 李民奐이 부윤으로 있던 월성으로 찾아볼 때에 전송하며 지어준 것이다.

권3은 疏(2), 祭文(7)이다. <本縣弊瘼疏>는 義城 縣監을 대신해서 지은 것으로, 1616년 災傷敬差官 姜遜이 本稅 외에 500여石의 虛稅를 勒定한 이후로 고질이 된 명목에 대해 혁파해줄 것을 호소한 내용이다. 제문은 張顯光, 朴僞, 姊兄 李舉, 사위 柳重河, 李廷機 등에 대한 것이다.

附錄은 上·下로 되어 있다. 李光庭이 쓴 行狀, 權相一이 쓴 墓誌銘, 金應祖·黃戩·申悅道·李元圭 등이 저자가 全州 判官으로 赴任할 때에 써 준 送序, 柳元之·李之煜이 쓴 祭文, 金啓光·南天漢·柳世哲·李玄逸·李惟禕 등이 지은 輓詞, 李惟禕가 1693년에 쓴 <樂善堂銘>이 있다. 끝에 저자의 曾孫인 申震龜가 1739년에 지은 文集後識가 실려 있다.

권미에 權相一이 1739년에 지은 跋이 있다.

孤松集序

孤松先生文集序[李光庭]

人之世濟其美難矣。能濟其美者謂之肖。肖者非徒肖其形貌。凡心性言行出處動靜。無一不相似。雖善相者。不能別焉。斯之謂肖。自古及今。隳壞其家聲者。指不勝屈。而能濟美而肖焉者。百不一見。其難矣乎。梧峯申先生慈祥恭儉以爲之性。孝友忠信以爲之行。律身甚嚴而行己潔清。以之不容於朝。而棲遲末班以終。不能盡其才也。孤松先生卽其胤。其事君親。一唯梧翁之於君親者。而行己處心。亦唯梧翁之所以行也。直言常不容於時。而莅官無不一躡其跡。其居家處鄉。發諸口而措諸事者。誰則非梧翁之典則乎。是故言行有章。出處有法。施諸身而及於人者。明白惻怛。無少疑晦。若先生可謂能子矣。世濟其美者也。其真肖矣乎。不佞晚生。不識公儀刑肖與不何如。而其出身而仕也。朝中嘖嘖曰真迺翁子。遊於旅軒張先生之門。而先生稱之曰克世其家者也。不佞之言。其非妄揣也。先生之遺文。故徵士李孤山先生旣標點其可傳者。而公之曾孫上舍震龜氏又屬不佞勘正其誤字處。並梧翁先生遺集壽梓而傳諸後。問序於不佞。不佞才不足以辨賢。文不足以傳信。而以世之鮮知德者。上舍君之諸累至而不已。愚不自量。輒纂次其遺行。旣又序梧翁集矣。其於公之遺稿。不敢更實別語。而但道公平生心與事善繼而善述者如此。以爲之敘。世之工於知言者。讀先生遺集遺事。以不佞言。爲可乎爲不可乎。

上之十五年仲夏下澣。平原後人李光庭謹序。

孤松集卷一

詩

檜山逢寒食 在檜山衙中。作時年十六。

客中時序去何頻。三月江南忽暮春。萬樹明花紅已綻。千條弱柳綠初新。聊堪小甕傾霞秫。不問隣家擣杏仁。陪奉鯉庭還故域。只今何恨異鄉人。

二

江南歲月苦怱怱。寒食今年又更逢。晴靄暮雲山色裏。落花芳草雨聲中。青精屢採還無賴。白蟻頻斟亦不功。遙想故園香火起。草堂梅老落東風。

三

桃花欲綻杏花開。冷節今來恨未裁。柳插千門飄綠影。煙沈萬戶颺寒灰。乾坤時序炎涼改。江海歸心日夜催。欲向東風謀一醉。玉罇相對酌清醅。

謹次槐山舅氏 趙公亨道號東溪 韻

景催凋暮。蒼茫峽裏村。久違驚白髮。叨奉對青尊。嶺月留前面。溪沙帶舊痕。青臯亦吾土。招^P得故園魂。

輓槐山舅氏

惟我外先世。金羅冠冕族。一時文武才。赫赫聳耳目。中間漸衰替。後來誰繼續。吾舅挺英特。聲華早超俗。效作揚雄賦。倒却陳遵牘。流輩氣欲盡。先鋒孰敢敵。詩書是其業。弓馬非所欲。男兒有大志。少年厭局束。搶攘一投筆。介冑同馳逐。操毫如有神。豈但控鳴鏑。取譽名相門。汗流文儒屬。平生宦路間。不肯隨涼燠。牛刀試割雞。歷典四郡牧。白首將營兵。薄宦非推轂。時命乃大^P謬。拂衣辭榮祿。歸來水石鄉。高臥便幽獨。蛟龍蟄寒沙。烏雀肥秋粟。親近惟几杖。晚契存松竹。時看案上書。細傾尊中醪。弟兄從談諠。遲暮慰寂寞。往者封豕突。陰風隨鐵木。江漢化爲血。烽火被山岳。公卿草間啼。聖主園中辱。于時送舅氏。遠逐戎馬足。崩奔幕府下。幾夜風露宿。干戈阻起居。悵望山川邈。俄聞戰陣敗。逢人懼消息。生還幸慰意。時事驚翻覆。未試馬鞍據。誰知范疽劇。難望藥餌效。冀賴神明力。天胡降禍酷。奄忽於牀褥。隣人輟相杵。骨肉摧心曲。憶甥負^P笈時。年纔二七弱。淹留受課業。慙慙蒙警覺。至今識姓字。恩義俱無極。方春亂離初。奉母入山谷。閤門免乖張。死生擬相託。人事未可料。團圓竟蕭索。悠揚荒山日。慘愴故園色。櫪馬似戀主。壁弓空留鞵。瓢棄尊無綠。魚乾書幾軸。音容難再奉。顧步涕橫臆。人生固有涯。世事又異昔。衣冠陷塗炭。文武爲猿鶴。子遺日騷屑。稅駕焉所薄。滿目悲生事。公歸有何戚。况復螽斯盛。盈庭覩蘭玉。應知馬家慶。未艾王氏福。祇是最難堪。門老漸零落。愧甥匪宅相。安能似舅酷。餘生失^P依仰。往事思如昨。高堂奉鶴髮。獨愁西日迫。常存渭陽情。矧今便永隔。崆峒之山麓。卜得萬歲宅。香火定不缺。永願妥體魄。靈輅斯就道。相紼巨阡陌。落月悲簫輓。秋風動哀壑。襄期在後月。辰良日吉夕。痘忌適纏身。孤負臨窆窆。幽明自此訣。拜辭長慟哭。

輓敬亭李公 民宬

玉壺秋月炯無塵。流俗頽波獨自珍。華國清文追雅頌。匡君直筆炳彝倫。儒林方切依歸望。邦運還逢殄瘁辰。叫向蒼穹何奪速。聖朝難^P得棟樑臣。

庭畔百日紅盛開。因寓感戀之懷。

雨後千枝忽放紅。穠華爛熳夕陽中。憶曾南郡庭前見。百日長閒瘴海風。按南郡卽昌原

次趙壽翁 松年 韻

雨收雲捲晚涼生。一抹斜陽岸外明。睡起小堂人寂寂。苔紋如畫滿階青。

二

金精一動畫。野鹿已踰垣。戰守無良策。關防失太原。行轅遼海遠。殺氣涓江昏。撫劍空回首。中宵暗斂魂。

聞趙壽翁往立巖謁旅軒 張先生顯光 迴。吟寄一絕。

卓爾巖頭吾未進。風乎零上子能追。一行濡染應多得。豈但錦囊千首詩。

苦雨

鶴鶴聲高日色溼。闌風伏雨久連旬。田翁每出愁殘麥。村婦長顰抱濕薪。幽逕草深迷舊卷。一川波漲失前津。今朝又起看天象。西北陰雲若轉輪。

P二

萬里風雷颯。連旬雨未開。山光青漠漠。水色白皚皚。田父無消息。朋知斷去來。沈吟守環堵。拘憫意難裁。

簡李子慎 廷機號漫翁

君家知有綠醅新。水月堂中集衆賓。抱病龜巖門獨掩。一庭煙雨鎖松筠。

次申君澤 濡 韻

士類當今屬望新。妙年賢路豈無因。風雲一變池中物。翰墨曾稱席上珍。魂與夢交存宿契。酒兼談接見天真。他時草詔金鑾殿。倘憶江湖把釣人。

二

世間交道白頭新。末路金蘭幸有因。燕石愧投星隕陋。隋珠忻得夜明珍。天街錫宴榮君實。谷口躬耕老子真。別後雲泥何處憶。洞門秋晚斷來人。

趙壽翁置酒邀近地諸伴會飲。罷後申君澤賦長律一首。遍寄諸伴求和。遂次其韻。按此二詩。經丙子兵亂後作。

● 谷口蕭蕭聽馬鳴。亂離顏面喜逢迎。溪山不負良辰景。禽鳥猶爲故國聲。爛醉却忘殘日暮。狂歌還繼小燈明。悲來暗下新亭淚。欲上危樓望北京。

二

參差谷鳥傍人鳴。行到山門倒屣迎。舉目莫揮周顛淚。長歌須聽楚狂聲。雲霞弄影千林暗。星月垂光萬壑明。兵後一場新舊面。不知何日會西京。

次趙壽翁諸伴聯句韻 時余置酒邀諸伴會飲

● 竹林深處小堂開。暇日招邀勝友來。密坐挑燈繁玉露。相攜移席倒雲壘。政須今夜歡情洽。莫遣明朝別意催。珍重瓊章留在眼。數回看去感高才。

臺前韻謝諸伴

蓬門晚向水雲開。鶴報松間客子來。已覺秋風生洞壑。更憐明月照罇罍。杜陵戀闕丹心苦。王粲傷時白髮催。滿座豈終詩酒輩。圖南應有濟艱才。

送金司書中表兄貫之 宗一 赴瀋陽

● 龍樓寂寞斷環聲。臣子寧論萬里行。故國衣冠雙鬢白。平生忠信一身輕。關雲漠漠孤鴻叫。遼海茫茫片月明。爲問歸期何日是。朔風揮淚倍離情。

重陽日有懷

蒼茫湖海歲將闌。佳節逢來却少歡。白首誰同今日會。黃花猶似去年看。詩因排悶吟愈苦。酒有消愁醉未難。祇是故人期不至。暮雲紅樹眼長寒。

往在癸亥年。先君養病于鷹齋。至今十有五年。而孤兒又避痘來寓于此。徘徊追慕。向之林亭溪谷杖履所及之地。宛然如昨。齋房四壁。墨跡黝然。雖不可明。謹認其手筆之猶存。摩挲嗚咽。自不能已。齋門外有小池。先君所嘗修鑿種蓮逍遙之處。而今池廢蓮絕。反爲牛馬所踐踏。此亦豈非與人事

變遷者歟。感舊之餘。情見乎詩。

鷹齋先壠下。鯉對昔年前。泉裏音容隔。人間歲月遷。依稀四壁墨。埋沒小池蓮。敬想餘芬在。難禁淚泫然。

P 二

趨庭兒是昔年身。萊舞堂中事已塵。最是滿山明月夜。幾回揮淚想風神。

大雪入夜不止。兀坐寒齋。心神悄然。因賦之。

天宇蒼茫暝色寒。風驅飛雪凍雲端。衡茅重覆還疑壓。禽鳥輕霏未劇乾。窮谷獨居人跡斷。誰家相訪酒杯寬。窻前頓覺衣衾冷。明燭長吟到夜闌。

二

P 向晚風威動。漫空雪景新。松棲千白鶴。地散萬銀鱗。忽起騎驢興。難逢訪戴人。荊扉靜瀟灑。何處染蠶塵。

雪後寒甚。獨坐口占。

病夫卧穩朝慵起。深院寒多晚啓扉。日照山崖水影動。風翻林葉雪花飛。女奴汲水顰眉返。穉子呵毫信手揮。龜縮小房愁寂寞。洞門終夕馬蹄稀。

夜坐有懷

急景三冬暮。羈棲一病身。庭闈辭已久。消息問 P 無因。谷邃風聲吼。窻虛月色新。寒天游子恨。此夜最傷神。

余少日從事學業。頗有自修之志。至今年迫四十。學日退而業未進。終不免爲鄉曲腐儒之歸。白首紛如之歎。自爾而至。且男兒生世。縱不能致君澤民。庶幾立揚當時。上效涓埃之補。下爲父母之榮。初豈無期佇於心者。而崎嶇場屋。虛過半生。蹉跎潦倒。已無及焉。則古人所謂富貴吾所自有者。其亦誤矣。然而若以得失亂吾方寸。而不知窮達之有命。亦非吾之所自期也。寒齋歲暮。風雨淒然。掩卷長歎。忽忽有魚鳥湖山之思。因援筆遣懷。

老去沈吟惜寸輝。向來忠孝素心微。學慚無聞名何晚。年近知非計已違。萬里鵬程難一到。平生龍劍

擬長揮。如今已斷紅塵夢。興在雲林與釣磯。

夢見金司書。覺後有懷。

夢裏分明見。欠伸却未眞。遼河方雨雪。關塞尙風塵。千里音書斷。三冬別恨新。何時一罇酒。相對故園春。

二

鵠原心死日。豺窟膽消時。眠食今安未。音書遠寄遲。越吟莊烏苦。漢節子卿持。一會憑蘧榻。悽然覺後思。

憶末兒

垂髮雙眉掩。斑衣一尺長。呼爺常履踵。索飯每從傍。別我能無恙。思渠未暫忘。寒天足不襪。應逐小兒行。

輓柳浩然

夙昔同書榻。相從竹馬初。親知惟我最。純謹孰君如。松栢開新兆。雲煙慘故居。高堂垂鶴髮。魂魄定躊躇。

輓申密陽汝涉 楫號河陰

南州自昔儒林盛。醇厚如公最老成。佇見盤根須利器。驚聞皁蓋變丹旌。風塵生意人間少。詩酒名流地下傾。別有親知長慟處。倚門黃髮淚交橫。

寄子慎 時子慎在霞峴

昨日樓中會。今朝別後思。煙嵐圖畫展。花竹綠紅滋。爲有重來約。聊題一首詩。孤琴蘿逕裏。引領已多時。

無題輓 代人作

秋山深處掩孤塊。蔓草寒雲酌一罇。惆悵小樓人不在。忍看明月照黃昏。

輓丹丘孫上舍 胤業

曾經萬曆太平年。白髮蒼顏地上僊。水國桑鄉身世穩。天門蓮榜姓名縣。卽今生意那堪說。從古歸人孰得全。原號安心松柏裏。千秋魂魄定翩然。

輓趙進士內從兄 咸英

丁丑年春哭舅氏。又將餘淚送吾兄。人間獨抱存亡痛。泉下應深父子情。門戶邇來無好事。亂離何處保殘生。題辭寄向江南去。雲日蒼茫萬嶺橫。

歲時病未省墓。悽感述懷。

病裏違先墓。雲邊望遠岑。松楸風雨暗。丘壠雪霜侵。歲換思采切。天寒感益深。潸然今夕淚。不覺自霑襟。

立春述懷

臘盡寒猶緊。天迴斗已東。江山餘積雪。梅柳候春風。病去知身健。憂多願歲豐。桑麻煙月裏。佇戴聖明功。

次水山李生 老一 草堂石門韻

龜湖回首是吾家。春晚田園景物多。苦被名韉能有力。長途不覺鬢添皤。

早朝過烏嶺

千峯松檜掩朝暉。嵐氣霏微灑客衣。二十四橋和夢過。落花如雪馬前飛。

次驪江巖寺韓相韻

Ⓟ 古寺依花木。登臨病欲痊。山河分大地。日月護諸天。白鳥飛無數。黃鸝語政圓。春風留一賞。回棹意茫然。

述懷

數月遊京洛。歸來鬢已皤。風塵徒侶隔。江漢夢魂多。拱北心猶切。圖南計轉訛。傷時無限意。回首一長歌。

二

名利非吾願。山林引興長。關心檢藥^裹。得意近糟床。自分顏坏鑿。人稱楚野狂。追思秦嶺路。底[Ⓟ]事往來忙。

喜雨

向晚霏微樹葉鳴。須臾銀竹暗前坪。簷間夜聽佳聲達。渡口朝看白浪生。北闕綸音新罪己。南方旱魃已逃形。秋來鼓腹衡門下。野老同爲聖世氓。

九月十二日酒席。敬次仲父韻。

山齋勝日小筵開。骨肉團圓共酒杯。醉把黃花留後約。願瞻強健百年來。

二

Ⓟ 佳節門闌一笑開。折花頻覆掌中杯。從今願卜源源會。莫待明年九月來。

三

清秋暇日好懷開。盡醉罇前不放杯。紅葉夕陽爭入眼。任教詩句上心來。

四

黃花開處玉罇開。香滿花枝酒滿杯。爛醉不知山日下。暮天風急鴈聲來。

階菊政妍。感而賦之。

愛汝豈無意。襟期歲晏同。嚴霜香益烈。冷雨色^P愈濃。獨抱淵明興。誰知屈子風。黃昏政愁寂。步履遶階東。

贈別徐明府 貞履○時移拜清風郡

聖主推恩重。明公舉最先。江山宜謝屐。樓閣接秦天。地出金沙軟。盤登丙穴鮮。楊州騎鶴興。此去望如僊。

次子慎鳶魚亭韻

危臺迢遞絕浮塵。高棟層軒制度新。漾日晴川明鏡動。連雲遠岫翠眉均。鳶魚靜裏觀飛躍。風月閒中作主賓。從此東華無夢寐。與君長往理^P漁綸。

二

名區瀟灑隔囂塵。滿目風煙氣象新。高閣凌雲巖勢斷。羣山圍野地形均。世間誰識嚴陵瀨。門外相逢鄭驛賓。向晚提攜乘逸興。白蘋疎雨捲輕綸。

次沈幼清 激 酬唱韻

世事悠悠閱變更。茫然遲暮百憂并。兵戈慘見遺氓盡。風雨聲聞大廈傾。男子十年磨劍志。野人千里獻芹誠。蹉跎潦倒今無望。欲向沙鷗問^P舊盟。

二

此身人世若醯雞。又聽秋蟲近戶啼。病裏光陰如夢寐。老來心事自摧低。繁雲弄影迷天際。怪鳥爭呼隔岸西。長嘯一聲書咄咄。憂端瀕洞北山齊。

又次幼清韻寄示 時幼清在邑中

晝靜空堂燕落泥。石榴花發竹林西。床前暫結思君夢。山水依依路不迷。

七月初二日。天宇開霽。星月交映。苦雨之餘。曾襟爽然。

幾日愁多雨。今宵喜見晴。疎星垂野白。新月出雲明。萬里乾坤豁。三更几席清。曾襟政灑落。朗詠下階行。

次冶隱韻遣興

煙嵐一抹映幽居。雨後叢篁長尺餘。窮巷寂寥車馬斷。案頭閒看古人書。

二

白雲深壑閉門居。滿樹鳴蟬午夢餘。養拙邇來塵念掃。靜中惟事課兒書。

P三

溪山端合野人居。花竹蕭森一雨餘。風送晚涼秋意早。岸巾高詠卷中書。

次豚兒觀漲韻

漏天何日報新晴。白水前灘看復生。急勢崩奔沙岸坼。吹聲喧下石門平。田翁出野愁沈沒。谷獸攀崖恐墜傾。聖代雲雷屯未已。老夫曾臆百憂橫。

秋居漫興

漠漠繁陰夕。蕭蕭細雨天。蘚花沿砌隙。蛙鼓鬧池邊。無事仍呼酒。看書便欲眠。翛然塵念斷。自道小神仙。

二

秋雨鑿殘暑。迎涼逸興豪。閒隨同社老。高詠古人糟。竹塢煙光鎖。松窻日影高。自知清淨好。永願脫塵勞。

三

自得園林趣。閒居寂寞濱。秋風送歸燕。落日斷來人。竹影侵書榻。花香襲酒巾。終期百年內。飲啄任吾身。

P四

谷口誰相訪。衡門草色深。青山疎雨過。綠樹病蟬吟。書卷課兒讀。酒盃從婦斟。村居政寥落。入夜聽寒砧。

沈幼清次嚴明府 鼎考 韻來示。仍和其韻。

平生忠孝用功深。遲暮泥塗費苦吟。楚野孤蹤方泣玉。漢庭諸子盡腰金。風塵世亂那堪處。猿鶴盟存可更尋。寥落掩門秋雨裏。賴君相話百年心。

又次幼清韻

Ⓟ 白首人間意未窮。此身端合臥牆東。平生雄劍空藏匣。盡日虛舟自逐風。山色水光秋雨後。農歌樵笛夕陽中。丘園趣味真堪樂。富貴從來付太空。

秋夕偶書

此身衰病日相侵。白髮蕭蕭已滿簪。三逕故園元亮宅。十年東海仲連心。寒蟲向夕啼空院。旅鴈將秋度遠岑。藥鼎茶甌忘世事。不關窮寂少知音。按此詩三四句。感中原陸沈。

秋夜偶吟

Ⓟ 松燈明滅照空堂。風露淒淒夜氣涼。衰病邇來偏少睡。臥聞庭草咽寒螿。

家人告燈油乏絕。明松堂上。男讀書女執工。各其職也。士女當以勤儉爲本。因賦以勉之。

秋夜曼曼永。松明照壁窠。長兒溫故學。少女執漚麻。勤儉汝曹事。艱難吾道何。華堂蠟炬下。豪貴不須誇。

次子慎投贈韻

苦憶李豪士。清談久不聞。書傳龜墅鴈。人臥鶴Ⓟ山雲。宿雨臺殘暑。涼風掃積氛。佳期須莫負。相對話羲文。

留別李立卿 廷相 兄弟

峽裏逢秋雨。淹留攀桂枝。爛柯看玉局。對酒賦清詩。脆葉梧先謝。芳心菊自知。風光兼別恨。駐馬更踟躕。

次杜詩絕句贈立卿兄弟

涼雨驅殘暑。輕風送落花。留連到日晚。忘却客程賒。

二

P 朝露淨寒竹。夕陽明晚花。詩情吾不減。罇酒子能賒。

簡內從兄趙子有 咸一

方壺風景近如何。一別僊區歲月多。遙想洞門秋色晚。菊巖楓壁映潭波。

次杜詩秋興八首 月課題

八月秋風起遠林。四山飛雨白森森。燕辭舊幕歸江路。鴈向南雲出塞陰。天上玉京千里夢。鏡中霜鬢暮年心。孤吟此夕愁難遣。更有數聲何處砧。

P 二

秋山寥落夕陽斜。節序驚心鬢欲華。軒陛未陳經國策。江湖空泛釣魚槎。追思萬曆年中事。幾處邊城月裏笳。身老時危無所報。不堪憔悴對寒花。

三

寂寞柴門掩落暉。雨餘嵐氣濕霏微。寒蟲號野聲如訴。危葉吟秋意欲飛。世路艱關何處適。年光荏苒素心違。前溪惟有苔磯在。時看鱸魚墜釣肥。

P 四

人世元同一局碁。筭來事變總堪悲。東頒鳳曆懷前日。西上星槎憶舊時。戰士無名出塞久。行宮遠狩入關遲。清秋悵悵干般恨。白首滄洲獨費思。

五

天作神都枕漢山。恭瞻宮闕五雲間。廟堂籌策論當世。閩鎮旌旄擁塞關。一節政須恢舊業。九重能得解愁顏。江南歲晚因多感。衰朽無緣齒鷺班。

六

亂後餘生易白頭。一年時序又清秋。江鄉政飽蓴鱸興。關塞應添鼓角愁。猝猝光陰同隙駟。悠悠身世等浮鷗。山林尚有憂君念。魂夢無端到漢州。

七

未效涓埃報國功。暮年蕭瑟草廬中。杜陵空拂衝星劍。宗慤長思破浪風。霜落洞門楓葉老。雨晴江岸蓼花紅。閒居一味還多幸。且上磯頭作釣翁。

八

漢城形勝四逶迤。秋色遙連太液陂。僊仗瑞雲丹鳳闕。禁園寒葉老龍枝。金鑪香裏清光滿。玉佩聲中爽氣移。獨在天南回首望。自憐蕭颯鬢絲垂。

重陽日感懷

風高霜落氣蕭森。四壑煙嵐弄夕陰。竹葉酒香初逆鼻。菊花房冷未開心。天機袞袞時將晚。人事悠悠思不禁。却憶去年今日興。插茱萸伴共登臨。

次子慎鳶魚亭韻

白石明涉十分奇。臺前澄碧是天池。一聲欸乃青山暮。世外風塵也不知。

二

超然高臥水雲邊。自道人間李謫仙。詩酒風流都外物。須從亭號尙前賢。

送申君澤之日本

昭代多專對。胡爲子獨賢。秦城天北極。漢節海東邊。行色春將暮。離情老更憐。慇懃執酌處。欲語轉茫然。

二

北節纔還後。南帆又杳然。艱危今日最。忠信古人前。瘴雨征衣濕。春風別恨牽。應知宣化畢。歸及九秋天。

暮春

冉冉春光暮。菲菲物色新。桃花紅半落。梅葉綠初勻。盡日人來少。空樑燕到頻。幽居無一事。寂寞養吾真。

惜春

我欲留春色。其如春不留。落花微雨後。芳草暮^P溪頭。衰謝嗟今日。歡娛憶舊遊。寬心有麴蘖。一酌散千憂。

篋中有亡友金謙可^然詩篇。披閱數回。拭淚而書。

宣城才子舊知名。存歿于今歲屢更。惆悵筆花猶在篋。數回披閱淚霑纒。

今年春不雨夏多潦。農事失時。西成無望。歎傷之懷。形於詞。

災害無虛歲。天心未可占。雨暘俱不若。旱潦沓相兼。漠漠雲衢路。蒼蒼玉殿簾。監門圖在手。中^P夜百憂添。

庭畔有百日花樹。雙榦挺立。去冬寒甚。花樹盡枯。今年新叢茂盛。開花可愛。

貞如松竹亦凋殘。脆榦柔枝豈耐寒。猶有新叢抽數尺。開花依舊去年看。

次李德輝臺巖會韻

閒尋蘿逕上高臺。斜日憑欄共把盃。列壑巉巖空外立。長江隱見峽中來。雲霞有約交情淡。風月無邊逸興催。更喜清秋佳節近。重遊須趁菊花開。

樓上炎蒸遁。乘涼却訝秋。清罇同笑語。玉局且遲留。月出山容靜。更深水氣浮。團圓到雞曉。便覺散千憂。

次嚴明府

此身端合臥田家。萬事如今不怨嗟。多荷使君寬禮數。且將罇酒慰生涯。衰容自哂千莖雪。佳節重逢九日花。寥落掩門秋色裏。回瞻東閣手頻加。

次李德輝韻

西風落葉舞寒梢。斜日虛窻見小蛸。四壑煙嵐圖畫展。一階花竹翠紅交。愁來暫拂衝星劍。醉裏空彈偃月弰。世事卽今堪白髮。餘生祇合臥書巢。

沈幼清來傳嚴明府重陽會酬唱韻。因和之。

使君才德溢心胷。千載重瞻宓子容。善政治民除害馬。佳賓滿座騁雕龍。紅粧錦瑟良辰會。黃菊清罇逸興濃。獨有習池吟病客。不眠寒夜聽霜鐘。

又次公堂酬唱韻

五十年來夙計違。鏡中顏狀漸成非。天寒江浦蛟龍蟄。日暮園林鳥雀飛。自信吾生元有命。誰知此老已忘機。從今堅臥雲山月。莫遣緇塵染素衣。

次鄭金兩友酬唱韻

一別如今歲月深。相思幾費短長吟。風塵荏苒書難寄。山水間關夢獨尋。丹葉黃花粧晚景。薄雲輕靄弄清陰。鳶魚亭上前期在。何日攜登滿滿斟。

次尹元賓 以觀 軒亭韻

棟宇臨青壁。藩籬向綠灣。不關無外客。只愛對前山。夢斷雲霄上。心閒水石間。時憑藜杖過。細話便忘還。

二

巖頭成小屋。簷影落清灣。貼石防隕岸。移松補斷山。襟期三逕裏。心事一罇間。堪笑東華客。遲回久不還。

三

伊昔青門裏。如今碧水灣。風塵逃宦海。京洛阻^P雲山。靜憇依松下。閒吟坐竹間。翛然無世念。不羨錦衣

次尹元賓 以觀 軒亭韻

早占碧山棲。前臨白石溪。窻開平野闊。簾捲遠峯齊。對酒愁全減。投床夢欲迷。看君多逸興。橋柱不須題。

二

愛此數椽棲。蕭然瞰碧溪。身爲南客久。心與古人齊。雨過松巖濕。煙籠柳岸迷。應知詩興發。拂石信毫題。

^P三

策杖訪冥棲。苔深雲滿溪。緣崖危磴曲。疊石小堦齊。木落山容瘦。沙平鴈影迷。沈吟不覺暝。寒月映棂題。

輓申汝遠 志道

鵝洲殘緒幸綿綿。先祖遺風不乏賢。情以門親相眷戀。事關鄉射倚周旋。人間存歿嗟今日。洞裏逢迎憶昔年。匹馬他時桃岸路。爲誰經過暫停鞭。

孤松集卷二

詩

赴召命到漢江。聞遞卽回程。甲申五月。以注書陳疏歸省親瘡。乙酉正月。上降旨特召。

名利奔忙媿此生。勞勞來往一千程。虛霏雨露無由報。獨抱琅玕未敢呈。落日漢津檣影動。春風關路馬蹄輕。長思鶴髮今安否。應倚柴門望我行。

竹山道中偶吟

東風芳草岸邊生。吟倚征鞍信馬行。關嶺極天^P雲日暗。不堪千里望鄉情。

早過龍安坪

漠漠平蕪宿霧浮。短鞭羸馬道途悠。如今始覺楊朱泣。添殺征人白髮愁。

路逢白足。細語金剛形勝。

名利場中世念纏。人間膏火幾相煎。聞渠細話金剛勝。願借飛筇訪羽僊

奉呈嚴明府行軒

東風官路馬嘶移。歸興飄然不可追。爲問玉溪明月夜。瑤琴聲裏尙相思。

^P二

琴鶴行裝不少留。追思撫字涕空流。那堪昔日絃歌處。楊柳依依掩小樓。

客中述懷 時寓在齋舍

前臘曾爲客。今春尙未歸。眼看新曆日。身著舊鶉衣。松逕從荒草。梅園帶落暉。應知少兒女。掩首倚荆扉。

遺懷

此生愁緒苦多端。半百年來覺渺歡。鶴髮堂前兼喜懼。紫荊花下獨悲酸。形容不是緣詩瘦。懷^P抱無因得酒寬。門掩小齋窮寂裏。沈吟坐到夜將闌。

松林

蒼髯赤甲鬱成林。月上峯頭萬壑陰。靜聽葉間風起處。依然清夜奏笙琴。

雨後偶吟

春雨初晴後。攜筇步履遲。巖花披紫錦。堤柳颺青絲。魚菜溪山足。農桑節候宜。田園多樂事。何日是歸期。

三月十九日。姊喪發還故山。時余寓在齋舍。不得哭送。其日曉登山麓。瞻望一慟而迴。拭淚書懷。

孤生人世意何如。忍見靈輶返故居。鶴髮在堂西日暮。歸魂歧路定踟躕。

二

丹旆淒涼獨去遲。此行那得問前期。春山曉月無窮慟。天地茫茫亦不知。

漫興

青山隱隱水潺潺。啼鳥聲中獨掩關。外客不來塵慮靜。幽居偏覺一身閒。

憶草堂

蕭條茅屋竹階隈。客裏愁吟久未迴。想見苔庭人不掃。東風無數落殘梅。

二

寂寂衡門傍翠微。滿園花柳鬪春輝。應知舊日巢堂燕。簷外含泥兩兩飛。

聞杜鵑

爾是微禽豈有知。翩翩毛羽託叢枝。如何入夜思歸切。啼向曉天無歇時。

春望

P 偷閒尋石逕。倚杖憇松岡。隔葉鶯聲慧。含泥燕意忙。桃花迎日暖。柳絮逐風狂。萬象皆春氣。羈懷獨自傷。

新綠

千山處處落殘紅。姚魏繁華一夢空。猶有滿園新綠好。清陰來映墨池中。

題亡友林汝平 以準 草堂

故人亭子偶來尋。石逕荒涼草樹深。猶有昔年庭實在。叢篁殘菊摠傷心。

二

P 殘簷破壁帶愁煙。人去亭空度幾年。碁酒舊遊如夢寐。不堪登眺淚潸然。

送子慎觀月城 按紫巖公時爲府尹

秋風吹起海雲開。遊子行裝日夕催。遙想鯉庭環侍處。棣華凌亂映階隈。

二

月城形勝冠南州。君去應知放遠眸。佇待錦囊收拾至。病中披玩慰窮愁。

三

經旬客裏荷相過。此日難堪別恨多。何處青樓P明月夜。金罇玉管醉婆娑。

輓南士鎮

君是髫年我弱冠。早將交契託心肝。向來憂病頻相問。遇處盃尊必盡歡。泉路徽音從此隔。匣琴流水爲

誰彈。他時遊歷星山下。忍見荒原草樹寒。

宿永順村舍

簷雨淋漓客夢驚。水村西畔聽雞鳴。朝來却恐灘流漲。催整晨裝上馬行。

途中有感

P 白首人間少宦情。胡爲扶病又西征。衝泥倦馬關山路。應使沙鷗笑此生。

滯雨水橋

水橋村裏稅征鞍。白雨連山漲石湍。煙澀濕薪爨火滅。風穿疎屋鬢毛寒。鄉愁杳杳身將老。客思茫茫齒欲酸。頭上陰雲猶未捲。計程何日入長安。

次赤羅宰金汝明臺巖酬唱韻

突起金剛百尺臺。一區形勝自天開。風櫺端合高人臥。雲壑應嗔俗士回。飛絮落花春色暮。晴**P**沙白石水聲來。吟邊景物難收拾。誰借胷中錦綉堆。

又次酬唱韻

臺亭風日暖。策杖暫投筇。幸接宣城謝。仍攜居士龐。清談繁玉露。新釀倒瓷缸。望遠同憑檻。迎涼更拓窓。乾坤春欲盡。山水景無雙。漠漠花如雪。陰陰樹作幢。煙光迷古岸。日腳下平江。詩有神應助。愁因酒自降。睽離凡幾歲。邂逅卽南邦。願託雲霞契。超塵避亂咙。

輓沈府尹 按此在全州時作

P 平生翰墨散珠璣。名譽才華一代稀。鵬向碧霄方奮翼。鳳尋丹穴奄藏輝。四年南國閭門隔。千里東風旅櫬歸。最是親知幕府客。吞聲不覺淚霑衣。

竹筍 與沈金兩生酬唱

巖前新筍迸連牆。雨裏森森尺寸長。嫩籜斜裁紈濕露。尖頭巧削玉生涼。臨軒恍若睢園景。尋逕還同栗里鄉。會待千竿拂雲立。北窻閒聽奏笙簧。

逆旅中。與金述初，鄭慶餘諸伴會飲。

Ⓟ 玉露三更夜。金風八月秋。罇前逢嶺伴。客裏慰鄉愁。白首歌猶壯。青衫宦未休。何時攜惠好。雲水理歸舟。

次金沈酬唱韻 金乃主倅弟也

風流當世士。俊逸不羣才。鼇弄張顛筆。鯨吞李白盃。扁舟南渡久。匹馬北歸催。遙想藏溪上。行尋舊植梅。金善草書。家在藏義洞故云。

二

我是龍門客。君如馬子才。異時頻接袂。何處更斟盃。別路連天遠。歸心與日催。禮羅聞取士。事Ⓟ業佇鹽梅。右二首擬沈作

三

末路初相識。憐君老有才。論文纔握手。話別却停盃。嶺樹歸雲暗。關山落日催。炎程愁思亂。病渴欲吞梅。

四

客裏逢君話。兼呼麴秀才。團圓仍秉燭。惆悵忽分盃。官柳鶯聲亂。離亭雨腳催。前期在歲晚。相對雪中梅。右二首擬金作

壬辰十月。蒙竄命將向碧潼。到水山留別權季明 以亮。

塞雲迢遞北風寒。冰雪關山道路難。白首相看成遠別。不堪愁思集征鞍。

二

月沈江岸鴈聲長。促節繁絃暗斷腸。惆悵與君分手後。天涯相憶路茫茫。

在平海配所。謹次季父韻。

賈傅空懷戀主心。梁鴻底事不平吟。孤臣報國非無日。只怕年衰白髮侵。

追次李上舍翼世韻寄贈

丹陽形勝國東偏。人傑如君豈偶然。風度定知追阮謝。文章直欲繼雄遷。罇前忽漫言難盡。夢裏依稀意未傳。遙想海山春政好。錦囊詩興獨能專。

次浩然亭韻 亭在平海越松浦。黃君湜家亭也。

尋真偶爾入金華。向晚行行踏玉沙。借問石羊何處在。白雲深鎖赤松家。

次李立卿萼湖里亭韻

慳秘千年若有期。青丘地誌不應遺。騷人今古留佳句。洞老春秋會秀眉。風動蘋洲香滿袖。月臨莎岸冷侵肌。夜來搖曳煙波裏。桂棹蘭槳隨所之。

二

登臨恍若訪安期。天鏡何年此地遺。檻外老松張翠蓋。岸邊垂柳展明眉。波光有意爭呈態。酒量無端自上肌。人世浮名都夢幻。一竿雲木願從之。

次眞城養眞堂韻。呈李子和 守誠。

佩聲顛倒下烏臺。天上僊蹤暫謫來。臥閣只看書與史。養眞長對竹兼梅。清川遶出丹砂窟。列嶂妝成碧玉堆。匹馬重尋違宿約。憶君無計共斟盃。時子和以持平黜爲縣監

前冬余蒙恩譴。路過花山。鄭仲則 伏 追送到府城南。聯枕而宿。仍以別語贈行。李翼之聞而和寄二絕。追次其韻。呈仲則，翼之兩友。

故國一千里。孤臣方寸心。驛亭寒日瘦。關樹凍雲陰。敢抱懷沙怨。猶存報主忱。窮途分手後。忍聽塞鴻音。

二

P 聖主陽春澤。微臣腐草心。天涯收客淚。歲暮返龜陰。虛負圖南志。空懷拱北忱。有時殘夢裏。長樂聽鐘音。

東子慎。時慎在洛陽。

別後思君夢不成。計程今已入秦京。飛騰莫負圖南志。潦倒空懷望北情。臺上鳶魚誰復賞。山中猿鶴浪相驚。青雲舊伴應無數。那識居人唱渭城。

韓李懷仁汝廓 弘祚號睡隱

吾友當時傑。才名戰藝初。鸞棲曾枳棘。蠖屈久 P 泥淤。論議令人服。醇真孰子如。安貧尋古道。避世卜幽居。雲樹三年別。存亡萬事虛。淒涼留寶帙。慘愴返靈輿。哀壑霜風動。荒原落木疎。無因漬酒送。瞻望淚霑裾。

次臥雲居士鄭仲則韻

勝地編茅景自幽。主人高致揖浮丘。倘來軒冕非關念。靜裏琴書足散憂。雲斂鶴陰明遠岵。雨晴沙渡漲春流。疎慵久抱煙霞想。何日相尋杜若洲。

二

P 心迹雙清地轉幽。囂塵那及臥雲丘。考槃隨處堪乘興。獻策當年謾抱憂。山鳥過庭屏裏去。水花飄岸鏡中流。遙知獨酌糟牀下。醉後行吟白鷺洲。

次水落臺韻 按水落臺在安東甘泉。水石奇勝。辛丑九月。鶴沙金公，拙齋柳公，木齋洪公。與一時諸賢。約會臺上相酬唱。時公任基川。送酒助歡。仍和其韻。

松桂叢中細路回。隔溪楓葉錦新裁。山明疑有丹砂窟。境僻誰知白玉臺。後水復隨前水落。今人又繼古人來。清秋悵望羣仙會。自愧塵襟獨未開

韓申君 坂

血盡高柴眼。驚聞玉樹凋。鯉庭如夢寐。鵬翮失扶搖。故宅梅初發。荒原雪正飄。無因漬酒送。垂淚坐寒宵。

輓金經歷德以 震遠

宦海津頭別幾年。遙瞻鳧鳥塞雲邊。自憐零落殘魂在。誰料悲涼旅櫬旋。往事已驚爲蝶夢。流光難繫縱風船。當時鴈塔題名處。點檢存亡一愴然。

次南塘酬唱韻

聞說新開數畝園。幽棲端合養靈源。霞光掩映丹砂窟。泉響潺湲白石根。追遠感深霜露節。投閒樂在華蓬門。傍人遮莫題招隱。世事如今不欲言。

二

疇昔雲衢逐衆賢。晚尋三徑詠陶篇。誅茅擇勝身堪老。品石題山句可傳。祇愛松楸長入眼。且將菖酒用爲年。多君孝思兼幽興。何日相從一粲然。

三

谷口深藏不啓關。園林瀟灑隔塵寰。耽看松菊巡簷外。酷愛圖書滿壁間。爭說聖君方側席。却歎賢士久棲山。紛紛堪笑終南客。何似寒泉自在閒。

輓護軍舅氏 趙公遵道

系出簪纓後。身居山水鄉。爲仁由孝悌。稟性本慈祥。筮仕年差晚。歸田鬢已霜。風塵無夢寐。魚鳥與倘佯。物外生涯足。閒中日月長。門闌共和樂。隣里襲馨香。星彩垂南極。萊衣舞北堂。始終元有理。倚伏互無常。崑玉恩優洽。仙輶去杳茫。自慚非宅相。酷似豈何郎。曠歲違牀下。縣情在渭陽。前冬候顏色。此日賦些章。人事嗟難恃。音容耿不忘。滿庭螽羽聚。耀穴鳳毛藏。餘慶人皆佇。遐齡世孰方。百年還倏忽。萬事卽悲涼。哀慕堂留號。驚呼鴈失行。幽明今別舅。孤露倍思孃。落月悽丹旆。秋風動白楊。青山一哭罷。流淚自霑裳。

輓南僉使大哉 海宇

虎榜登名早。天門授鉞遲。伏波冤莫白。都尉數多奇。身佩前年玦。魂招舊日衣。薤歌經過路。瞻望淚交頤。時大哉在謫所喪逝。故第三句五句及之。

輓李君姬老

處士生涯達水湄。長年茅屋耐寒飢。龍門路阻奇才屈。蘭砌芳殘舊業衰。玉露清談難更聽。錦囊玄訣孰重披。臨牋別有無窮痛。鏡裏孤鸞不忍窺。

次沈幼清韻。贈李子慎。按李公三代守忠州

祖子孫間歲幾經。今君踐位牧遺氓。雄藩游刃承先跡。暇日鳴琴對晚晴。街路佇看螭首聳。邦人惟恐雪山輕。光前懋績真無忝。從此鵬騫萬^P里程。

輓李上舍士明 重炫

有美儒林秀。家庭世襲芳。聰明兼孝友。樂易且端良。早抱屠龍志。時從戰藝場。人期攀桂客。名止採蓮郎。璧月沈滄海。蘭香隕夜霜。高堂雙白髮。虛幌二青孀。香火嗟無主。晨昏孰事亡。徽音歸厚夜。寶帙落空牀。霞壠千年宅。雲山一畝庄。不堪回首望。揮涕賦哀章。

次李立卿漁梁韻

雨後前川赤鯉肥。漁梁日夕坐忘歸。波頭不見^P金鱗下。應向龍津待奮飛。

二

幾年塵土憶鱸肥。雲水鄉中早賦歸。竹杖芒鞋濠上興。相親惟有白鷗飛。

申君垓卜居於新堤湖邊。前年春過其居。草堂瀟灑。景趣可愛。壁上有沈久玉 玠 短律。諸人多和之。仍次其韻。

谷口幽棲地。湖邊別有天。波澄魚動鏡。沙晚鷺依煙。樹影侵書榻。花香襲酒筵。誰將山澤勝。移入畫圖傳。

^P二

暇日乘春興。經過小洞天。初疑非世界。更喜有人煙。捲網魚登艇。開罇月滿筵。名區知有主。慳秘待君傳。

輓成江界汝習 以性

小白山前一別離。嶺雲湖月幾相思。宦途榮辱何須說。暮境存亡祇自悲。百歲桐鄉遺惠在。三朝蓬閣令名垂。如公合置儒林傳。借問當今秉筆誰。

輓李君景栢

○ 養拙田園裏。甘爲聖世氓。明農守舊業。教子讀遺經。風急連枝落。天寒獨鴈鳴。白頭題訣語。瞻望淚河傾。

輓李君景樟

荊樹風摧日色愁。百年人事悠悠。雲庵山裏連新壠。應有雙魂月夜遊。右悼兄弟俱逝

詠盆上紅梅

誰想紅珠綴綠枝。耐寒貪睡故開遲。夜來忽覺芳心綻。酒暈何從上玉肌。

二

○ 芳姿移上小圓盆。日夕相看坐到昏。論品莫分紅白色。均爲雪骨與冰魂。右用幼清韻

三

昭君朱粉春風面。曾向當年畫裏看。千載貞魂猶未滅。更將芳艷託枝端。

輓李君廷望

養拙田園裏。沈冥送一生。教兒傳世業。閉戶免鄉評。暮境存亡痛。重泉父子情。從前分義篤。別淚自霑纓。李君歿後。其孤繼亡。故第六句及之。

李方伯尚眞歷訪而去。中路見寄。仍次其韻。

○ 魏野幽居萊節過。夕陽瞻望使人愁。此後相思何處是。白雲紅樹楚山秋。

輓鄭參奉仲則

文希韓柳筆鍾王。半世才名一命郎。窮達在天君豈恨。存亡殊路我偏傷。愚川勝景還蕭索。雲寺佳期孰主張。莫歎鄧家無繼嗣。螟蛉有子奉靈牀。仲則嘗以書要我會話于孤雲寺。遷延未果。幽明遽隔。痛哉。

二

天以才華旣賦君。胡爲落魄臥江濱。書樓老去^P光陰促。試院年來好惡分。脩夜忽驚沈璧彩。此生何處襲蘭薰。惟餘篋裏珠璣在。留待侯巴識子雲。

次丁上舍君獻 瑜 韻 聞君獻作乞糧行。中路阻雨徑還。余以穀斗教其窮。

書窻攻苦不謀身。垂白堪憐作乞人。勺水可能霑涸轍。定應捫腹坐寒晨。

二

老驥之心病鶴身。邇來棲作碧山人。閒居尙抱憂君念。夢入天門玉漏晨。右寓居無聊述懷

戀盆梅

瓦盆尺土託孤叢。嫩萼團團幾點紅。別後邇來消息阻。好須無恙待東風。

贈別申方叔 粵 謫行

子罪伊何我不知。相看無語暗含悲。家庭所學惟忠信。莫向明時作楚詞。

二

商飆蕭瑟馬寒嘶。一鴈孤征帶夕曦。雷雨湖山應不遠。佇看髭髮勝平時。

輓丁上舍君獻

^P 事業瑩窻下。田園鶴麓邊。功名違宿計。詩酒送殘年。此別泉重隔。餘生雪滿顛。哀辭兼慰語。庭有子孫賢。

次子慎韻

宦海波邊莫玷危。山中猿鶴怨歸遲。世情閱眼經千變。時事關心值百罹。白首投閒聊可樂。青雲失路不須悲。知君老去猶豪爽。好展賓筵喚雪兒。

又次子慎韻

大器如君佇晚成。胡爲牢落過平生。羊腸在眼^P常存戒。蠹毒潛波豈不驚。元亮田園尋舊逕。杜陵心迹喜雙清。誰知冰月堂中老。逃世高風衆所兄。

二

國恩圖報竟無成。簿領叢中誤半生。物外霞煙歸思切。鬢邊霜雪壯心驚。高名月嶽山俱仰。廉德琴臺水共清。歲晏襟期松菊在。結交何羨孔方兄。

次子慎鳶魚亭韻

一去名區已十年。多君歸臥謝塵緣。平沙鷗鷺^P來還往。列嶂煙雲斷復連。遲暮關心親玉友。中和無夢預金錢。楸間况有遺文在。莊誦應無外物牽。

二

金剛突起作臺形。敬老當年卜此亭。檻外清流挹練素。雲邊遠岫擁螺青。業傳堂構膽輪奐。身出風塵入窈冥。飛躍一章須理會。世間何物擾心扃。

三

躍者爲魚飛者鳶。飛何戾天躍何淵。目前活潑^P觀其妙。心上推明識所然。萬化流行元浩浩。一章拈示最拳拳。茲亭佳號非徒爾。須對遺編仔細研。

四

一江風月擅雙清。鐵壁曾經禹斧成。堂構聳觀稱孝子。宵襟追想揖先生。天淵妙理常存目。軒冕浮榮不係情。莫道黃樓滕閣勝。何如靜裏玩誠明。

臺前韻

指魚鳶問曰魚鳶。那識飛天與躍淵。仰觀俯察^P惟理耳。揚鱗縱翼各悠然。先生卜地留嘉號。才子題詩敵老拳。白首紛如吾有歎。願將心法共君研。

次景贊亭韻 亭在佳音里

賀燕爭飛繞檻邊。巋然傑構帶冰川。比隣少長同修契。佳節春秋每展筵。會見風流成美俗。政宜觴詠度殘年。白頭却憶經過地。猶記當時父老賢。

次趙顯甫 咸世 五宜軒韻

東風起幽壑。人臥草堂春。一任吹衰鬢。何嫌落^P醉巾。敬傾花影亂。搖颺柳絲新。緬想詠歸興。山林足養神。右春宜風

小軒納夕涼。峽裏政炎夏。露頂倚牀邊。披襟臥牖下。心神自爽清。時日多閒暇。借問熱中人。何如趙上舍。右夏宜涼

雲陰廓掃盡。桂影一天秋。羣壑忽如畫。疎簾催上鉤。興因詩自遣。人與景俱幽。清福君偏享。塵中知者疇。右秋宜月

幽人不出戶。偃息過深冬。但聽風敲竹。寧知雪亞松。爐煙凝滿壁。罇酒煖盈鍾。堪笑紅塵客。衝^P寒趁曉鐘。右冬宜燠

知君多道氣。瀟灑出塵間。小構宜經歲。殘年合養閒。興來長對酒。睡起飽看山。歎我衰頹甚。高蹤不可攀。右此身宜處其間

次趙顯甫 咸世 五宜軒韻

雨後山中並馬行。洞門流水浪初生。衰年重引雲林興。塵世還慙利祿榮。話及舊遊渾似夢。醉斟深罇更多情。從今惠好頻來往。莫負香山九老盟。

二

^P罇前握手酒三行。白髮蕭疎愧後生。漠漠溪山雲裏隱。依依花木雨中榮。天邊虛負圖南志。樓上空懷望北情。送老林泉惟有計。願君從我結幽盟。

三

樓前立馬欲將行。摻袂踟躕別恨生。佳句迭酬追太白。深杯更酌對公榮。他時會合須如約。數日團樂不盡情。翻覆世間堪可笑。吾儕庶保百年盟。

洗心亭口號 亭在水院溪邊

十年奔走喪吾真。頭上蕭蕭白髮新。此日塵心都洗盡。從今免作逐名人。

鳶魚亭酬唱韻 吾鄉老友皆來會。張君聖源亦不期而至。時流頭也。

主人亭子似僊居。匹馬重尋十載餘。雨歇江聲吹地轉。煙收月色動沙虛。罇前共喜非新面。物外還忘返舊閭。老去紅塵無夢寐。卜隣吾欲結茅廬。右口號

由來分義自先公。憶昔過從洛水東。爭說傳芳家範在。祇憐遭別命途窮。塵埃末路多軒鶴。雷雨何年起蟄龍。白首吾生今已矣。投閒方欲學佯聾。右次張聖源

江畔有臺臺有樓。赤羅形勝是西陬。深林細逕尋前迹。層壁危巖到上頭。漠漠煙霞迷遠壑。依依笙鶴過長洲。此身如在方壺裏。乘興都忘鬢髮秋。右次主人韻

二十年前久別離。嶺雲湖月幾相思。重逢不覺淹歸駕。暮境情懷異少時。右贈聖源

疊次前韻。以謝主人。

聯翩驅馬訪巖居。政值流頭一雨餘。層壁出雲山勢斷。晴江漾日水光虛。良辰邂逅仍同席。疇昔分張各異閭。從此共成來往計。不關鳴玉禁中廬。

二

投絃高風孰似公。晚年閒趣在墻東。一區風月藏無盡。十里江山望不窮。莫遣佳人彈別鶴。更聽豪客騎雕龍。餘生敬雪同歡飲。世事如今只願聾。

三

才器端宜侍鳳樓。胡爲棲息水雲陬。積年輿馬塵隨眼。晚節江湖雪滿頭。山鳥遠過青草岸。沙鷗時起白蘋洲。佳辰勝會真難得。千載如逢赤壁秋。

四

罇空客散便成離。回首那堪別後思。莫道咫間千里阻。夢魂猶有往來時。

輓季舅氏 趙公東道

峽裏辭違落幾萸。殘年倍切涓陽情。那知此日音容隔。忍賦些章涕淚零。花甲九旬人所罕。祖孫三世福

誰京。重泉應與先慈會。爲說孤兒鬢髮星。

贈沙塢金稚玉 尙琦

水北山南幾歲離。偶成奇遇話心期。人間聚散元無定。却恐催題送別詩。

二

江上青山山下廬。故人眠食近何如。祇緣衰懶稀相訪。非是無情記憶疎。

三

世味辛甘已遍嘗。半生何事踏羊腸。同君來往寬閒野。乘興還忘鬢髮蒼。

次稚玉首尾體韻

可惜光陰如轉車。殘春屈指日無餘。良辰會面眞非偶。暮境交情却倍初。共把清觴裊細草。雙垂白髮數羣魚。吾儕得意須行樂。可惜光陰如轉車。

二

可惜光陰如轉車。幸逢沙老賞春餘。巖花半落風吹後。堤柳增輝雨過初。泝興悅親聞舍瑟。濠遊豈獨擅觀魚。相攜勸酒君無怪。可惜光陰如轉車。

三

可惜光陰如轉車。相看華髮幾莖餘。君猶勤苦詩無敵。我幸優游賦遂初。攜手欲追商嶺鳳。臨流何羨釣臺魚。芳辰好會堪乘興。可惜光陰如轉車。

再次首尾體韻

蓬門何恨斷來車。罇酒逢迎苦憶餘。肝膽更披頭白後。瓊琚隨落眼青初。誰知霧隱南山豹。曾佇天游北海魚。醉裏相看兩不厭。蓬門何恨斷來車。

二

蓬門何恨斷來車。世上交情半耳餘。雲樹戀深經歲後。金蘭歡洽展筵初。岡頭雨歇宜尋蕨。磯上風微可釣魚。矮帽短筇頻會面。蓬門何恨斷來車。

又

何關駟馬與高車。樂在幽閒不願餘。萬事都忘殘夢裏。一罇相對晚涼初。紛囂堪笑爭眞實。懶惰無心辨魯魚。養素全眞足安分。何關駟馬與高車。

二

何關駟馬與高車。晚占田園數畝餘。花落草生春去後。鶯歌燕舞睡興初。不妨時起西湖鶴。莫負同觀丙穴魚。投老萬緣俱掃盡。何關駟馬與高車。

輓金君時省

疎拙吾偏愛。飢寒衆所憐。同鄉成白首。此別間黃泉。曉月窮山裏。霜風落木邊。翩翩丹旆去。瞻望淚潸然。

輓南君海容

端良純謹入鄉評。人道公堂有滅明。惆悵徽音^P今寂寞。青山何處哭新塋。

次申方叔盆梅韻 時方叔蒙赦還

湘潭久別故園梅。幾使孤根待主來。雨露同霏無爾我。心期暗託絕嫌猜。芳姿悅若春生面。勁節還疑玉作胎。遙想月明窻壁靜。盆前應醉蘸香盃。

輓鶴沙金丈 應祖

冰雪清操仙鶴姿。不知巖上早從師。銀臺玉署三朝望。龜首龍趺五郡思。恩典遠加鄉黨慶。隣春忽輟士林悲。餘生戀德今安仰。漬酒情乖^P淚自垂。

輓洪君是榮

術家本茫昧。小道豈稱君。祇是相知久。難忘屢顧勤。衰年顏面阻。今日死生分。惆悵囊中訣。寥寥不復聞。

輓南大受 海準

往時頻沐過龜廬。暮境分張各異居。惆悵舊遊真夢耳。淒涼哀輓忍書諸。親知歷數惟吾最。福慶俱全孰子如。祇恨未成蒿里餞。白頭瞻望淚霑裾。

樂善堂成後偶吟

小堂端合養衰翁。高枕冥棲世念空。祇願年豐家國奉。秋來雞酒比隣同。

二

半生堪笑夢邯鄲。老去投閒分所安。瀟灑小軒佳趣足。白雲青嶂畫中看。

三

山如屏障谷如盤。誰識幽人樂考槃。蕭颯雨聲驚午夢。枕邊微覺鬢毛寒。

四

前臨碧沼後蒼巒。洞壑幽深樹影寒。外客不來門晝掩。懶搖團扇臥窻間。

持寶寺酬唱韻

白霧連山雨腳飛。林深苔滑路依微。天公亦解分離恨。鎖斷歸程暫駐騑。

輓朴寶城 宗杓

禁密初登選。邊陲再典城。纔聞擁阜蓋。誰料返丹旌。埋沒封侯志。悲涼相紉聲。友于人共識。遺行入鄉評。

輓柳善久

庚子生同到白頭。曾從伯仲季間遊。聯珠寶彩今難覲。別鶴哀吟獨未休。詩禮庭前蘭日茂。孝廉船上月空留。去秋罇酒江村會。一夢依然涕自流。

次洛阜堂韻 按洛阜堂。卽故正李公爾松江亭也。

白茅新蔭數間堂。戶牖憑高枕席涼。遠岵出雲螺髻聳。平波漾日錦紋長。早知養拙應吾道。晚覺安心是藥方。煙月釣遊堪送老。濁醪麤飯亦何妨。

孤松集卷三

疏

陳情乞省疏 甲申五月以注書陳疏

伏以臣偏母在慶尙道義城地。今年八十二歲。疾病呻痛。殆無虛日。臣以單獨一子。情不忍遠離。而感激天恩。黽勉上來。千里之外。母子相阻。一日二日。無時不思。昨者得聞母自臣登途之後。重患痼疾。證勢危劇。朝不保夕。驚惶憫泣。肝膽如割。臣猥以寒遠孤蹤。新忝內庭末班。一望天顏。是臣之願。且勅行到頭。此時求退。分義未安。而臣之情理。罔有涯極。不得不仰籲於孝理之下。伏乞聖慈特垂憐察。許令遞臣職名。俾得歸見母病。及時救療。俾延須臾之命。不勝幸甚。臣無任兢惶憫迫之至。

本縣弊瘼疏 代主倅製

伏以蟣蝨微臣。誤蒙天恩。職叨親民。揆分難堪。惟思殫竭心力。少酬萬一。而臣賦性愚劣。智慮短淺。居官一年。百爲乖當。怨讟朋興。而民不見信。風俗日敗。而事有可駭。蔑效涓埃。徒竊廩祿。環顧兢惶。罪合汰黜。而第伏念一日在職。當盡一日之責。則未罷之前。不但爲安坐美食而已。況本縣弊瘼之端。不一而足。其中有守令省臣之所不能擅便。而一境無告之冤。或阻於四聰之下。則臣何敢泯然無一言以聞。益重臣之罪戾乎。謹綴民間疾苦之狀。瀆洩冕旒。以待廟堂裁處。伏惟殿下試垂察焉。嶺南左道以上十三邑。最爲瘠薄。而義城爲縣。介在其間。東北二面。皆是大山長谷。野無寬曠。田多沙石。土品之瘠。生理之艱。與安東榮川諸邑無異。故居民貧窮。雖值豐登。而其終歲勤苦之作。僅得供賦稅輸公債而已。一遇凶荒。餓殍相連。啼呼危迫之狀。罔有紀極。臣到任之後。接得民訴。取考文簿。則自昔年分等第之時。本縣之例。不出於下下。而下之中之上者則無幾焉。此實因其土品。參以目見。而收稅之從輕。自不得不爾也。亂後癸卯量田。本縣最爲偏重。而出稅之規。猶仍舊制。餘氓之得以保存者。良以此也。及至光海朝。丙辰年間。災傷敬差官臣姜遜。罔念國朝收稅之法。惟以加賦爲務。乃於下下之中。勒定下上下中。本稅之外。加出虛稅。一結元稅四斗之外。或二斗或四斗。積而至於五百餘石之多。此豈損上益下之義乎。自是之後。因成謬規。爲後日無窮之弊。取一境生民之怨。當時奉使之臣誤事之害。尙忍言之哉。逮我主上殿下即位以來。痛革弊政。一國之人。前所不便及所願欲而不得者。悉罷行之。而獨此勒定之稅。因循至今。甲戌量田之舉。政是變通之機。子遺編氓。願得須臾毋死。思霑惠澤之及。而當事之臣。不體我殿下均賦之意。越視冤呼。終莫蠲減。不寧是已。打量之時。不審地品之高下。惟以數衍田結爲能事。轉輒加等。不遺餘力。本縣量田之偏酷。爲一道所共知。而出稅之數。比前倍蓰。譬若積年痼疾之人。添得死病。更無蘇復之望。民之無祿。何至於此邪。臣竊念我國收稅之法。元無一定之規。每年秋熟之後。發遣敬差官。踏驗田畝禾穀之實。看審水旱風霜之災。隨其所見。上下其第。前日之上者。或爲今日之下。前日之下者。或爲今日之上。豐凶不同。增減必詳。一從便宜。俾無冤苦。此數百年流來之良法。而一經姜遜勒定之後。上者仍上。中者仍中。襲以爲規。守若畫一。年年敬差之發遣。尙仍前日之例。而等第之膠固不變。大有違於或上或下之制。名存實亡。有同告朔之餼羊。國家敬差官設立之意。豈端使然哉。嗚呼。覆載生成之中。凡根莖芽甲之

類。尙未免舉數之隆替。獨於禾穀之歉稔。豈無隨歲之異。而今其稅法若是其乖宜。可勝歎惜。臣愚以爲田分六等。稅有九等。田之等數。雖不可更改。而稅之高下則隨時變通。豈可以姜遜之背理蔑法者。爲今日昭代遵行之規乎。臣請以耳目所及。援例而言之。姜遜虛稅勒^P定之邑。最爲稱冤者。惟安東義城及榮川諸邑。而安東則今平安監司臣閔聖徽曾爲府使時。疏陳其弊。特蒙蠲免。已有年矣。榮川等官。儒生亦連章訴冤。今年踏驗時。得預分揀中。安束之於義城。義城之於榮川諸邑等視之。則土地之瘠。大抵一般。而不得均被聖澤。噫莫非王土。莫非王民。而苦歇之縣殊若此。臣未知一邑之民奚罪焉。往在丁卯年。前判書臣金時讓爲本道監司時。深知嶺南下上下中偏重之弊。啓請均一磨鍊。本縣應在其中。而議寢不行。最是^P可惜。而今左承旨臣朴明樽啓辭。亦歷舉下上下中偏重之邑。雖不並及本縣。而其中所謂下中五分之四三者。抑非本縣之類邪。臣伏聞安東下中蠲減之時。聖教有曰姜遜勒定。非但安東。處處皆然。則亦當均一施行云。大哉王言。列邑生靈之冤痛。殿下既已明見於千里之外矣。瞻聆所及。孰不感泣。而只緣本縣不卽籲呼於天地父母之前。致令鴻澤不咸。臣竊慨焉。噫一夫向隅。滿堂爲之不樂。今茲一邑之抱冤。不但止於一夫之向隅。而百里之內。同是^P殿下之赤子。則其於一視之仁。豈無惻然者乎。矧今經亂之後。國家多事。賦役繁重。加之以牛畜殆盡。民事失時。無前之旱。又至此極。百穀焦枯。望斷西成。生民顛壑之患。迫在朝夕。常例貢賦。猶難責出。况五百餘石虛稅之徵。何以異於鑿空而穿無乎。若循謬制。不思一變。則臣恐闔境之民。將不聊生。農夫釋耒。工女下機。扶攜四散。鬼面相吊。此固字牧之臣所不忍視。而殿下之亦當盡傷者也。臣伏聞近者自上特選清班。差各道都事敬差官。以察年分。我^P聖上勤恤民隱之意。藹然可見。遠近含冤抱痛之民。莫不翹足而待。臣所謂本邑痼弊。若失此時。不卽蠲罷。後無及矣。至於本縣元結幾何。下上幾何。下中幾何。下下幾何。此則具在地曹稅案。臣不敢枚舉煩瀆於萬幾之中。若令該曹取考之。則民生冤痛。若燭照而龜卜。伏願殿下特垂洞燭。亟賜變通。天日之光。遠及於蔀屋之下。則一境顛連。庶幾其穌而無不獲之歎矣。臣係官遐方。迹遠天門。區區狂僭。其亦不自量己。臣誠惶怖。而抑有一款不得不尾進焉。臣^P伏見兵曹行關。以大丘束伍哨官李信元上疏。搜括列邑兩班奴子。充定束伍戰亡者。於此而臣之惑滋甚焉。臣守土之一官也。列邑之事。則雖不敢知。而以臣目前所見言之。本縣所居兩班。率多躬自農業。其中稍有奴僕者。十無一二。而往日戰亡之卒。半是私賤。則從前已被充定。不爲不多矣。而今其餘存。本無根著。以備應門而已。一聞令下。閭里騷然。鳥駭狼顧。咸有走心。若一朝驅之以充軍伍。則彼無根荷擔之輩。籍名纔已。便作逃卒。其程督侵撓之弊。轉及於其^P主。畢竟並與奠居者而盡爲石壕之村。其誰肯同仇偕作。爲貫頤奮戟之士乎。此固非細慮。而且雙嶺赴戰時。本邑軍兵。以左營所屬。先受敵鋒。全營敗衄。頭腦僵仆。鬼神孤傷。總計死者至於二百十餘人。而其中束伍軍物故太半。子而孤妻而寡。父母而哭子。兄弟而哭同氣。一境之民。蒙白居多。其視列邑將士之棄甲曳兵而走者。則亦有間矣。當此邊憂孔棘之日。莫重軍額。不可虛缺。設或充代。其數所當通計道內戰亡者。隨其邑之大小。均一分定。毋拘多少。則籍軍^P有實效。而齊民免池魚之殃矣。今乃以一武人上疏之故。遽使本官全數充代。哀此一邑之民。何辜于天。而死者既膏於野草。子子餘民。又從而束縛於行伍。徑致流亡之患乎。臣竊爲今日憂焉。伏願殿下亦令有司。從便議處。俾無驚潰之患。不勝幸甚。當此國家板蕩之餘。收拾人心。爲第一先務。則臣之謬計。所不可緩者。虛稅之罷。而所不可急者。搜軍之舉。均合於收拾人心。故不以出位爲嫌。剖肝瀝血。冒死陳達。固知微末愚臣之言。不足以上動天聽。而只恃^P聖明不以人廢言。誠發於中。不能自己。臣無任激切屏營之至。

[주-] 束 : 東

祭文

祭旅軒張先生文

恭惟先生。受天間氣。一心向道。學以爲己。真知力踐。義精仁熟。清純渾粹。不露圭角。德宇冲襟。充然自得。爲世師儒。遠紹正脉。操修之功。至衰彌篤。樂彼巖頭。爰構數椽。仁山智水。妙契天心。下有游魚。上有飛鳶。冥會在斯。富貴浮烟。白髮韶顏。頤養幾年。一部義經。俯讀仰思。寤寐周孔。P 研深極微。沈潛涵泳。探盡天根。吟邊風月。靜裏乾坤。優游遲暮。謝絕塵紛。蒲輪屢至。鶴書斯勤。翻然一起。朝野拭目。咫尺天顏。言意懇惻。丹鳳暫儀。白駒難繫。遠辭脩門。婆娑初服。羣情缺望。聖心如矢。雲龍際違。霖雨思極。雖未設施。表儀家國。云胡不淑。遽至易簣。山林寂寞。吾道誰托。邦無蒼龜。士失宗師。天之將喪。慟哭何追。粵我先人。分義甚厚。肆余小子。最承恩遇。瞻仰德範。何日忘之。科場汨沒。世累奔馳。不得長侍。杖履之側。質質至今。禽鹿視肉。撫躬自悼。雖悔P 莫及。往歲之春。天地翻覆。軒車徂東。住駕龜池。拜候牀下。承誨移時。那知一辭。便成永訣。道里阻隔。事故纏縛。歿未及殮。葬未執紼。奔赴後人。築室無因。余懷之悲。有淚霑巾。烏山峩峩。洛水汪汪。氣象森然。愈遠難忘。茫茫宇宙。荏苒流光。初暮載屆。感念益長。田園秋晚。松菊荒涼。單盃薄奠。曷罄寸心。一慟筵前。冀賜昭臨。嗚呼痛哉。

祭朴上舍仲宣 僞 文

嗚呼。兄今在於何方。遊於何處邪。平昔與兄離。率不歷歲。移時則必合。不合則必有書以相問。P 今月已廿四矣。歲已三矣。而面不得相見。書不得相問。未知兄在於何方。遊於何處邪。噫兄其永歸矣。此生不可得復見面目矣。嗚呼。親屬之於我兄。相愛者非不多。儕輩之於我兄。相知者亦且不少。然孰若我之愛兄之篤知兄之深者乎。世好外飾而兄則質而不文。世尚口給而兄則訥而不佞。混混與世相濁。行身而不見惡。發言而無觸諱。接人而必盡誠。蓋其素性然也。兄自少善於詞賦。早登國庠。因不輟舉業。庶將光我外門。而蹉跎場屋。終至於蠖而不伸。茲非命P 邪。兄於先人。乃表從姪也。先人平生。以早失所恃爲至慟。於外門諸族。篤加眷戀。况兄質純志學。負笈往來。先人之視兄猶視子。兄之事先人如事親。當先人丁未之遭憂也。兄與伯兄至誠匍匐。擊卒不怠。往從山廬。三年而後始歸。當時余雖癡童。到今尚能憶得。而先人不忘之錄。又表銘感之意。此雖至親間情義之固然。而求之今世。蓋不易得。至於甲子歲初。兄又與伯兄。聞先人之病革。來省牀褥。日夜侍藥。及遭罔極之變。兄痛門之衰。哀余之孤。殮葬甚祥。靡不來顧。P 余之於兄。情復何如也。余年少兄十一歲。而交遊之樂。實同昵朋。山中書榻。洛陽旅館。科場風雨。酒席花月。到處相隨。未嘗睽違。今雖不盡記憶。其在幾年幾月。而出處往來。與同甘苦者數矣。歲己卯我與兄俱中鄉解。一日兄作書來抵。邀我山房。經學相磨。余亦樂兄之意。束裝將赴。而事故牽掣。遷延旬月。豈料佳期末卜。兄之凶報。遽傳於夢寐之外邪。痘忌初梗。疾病繼纏。殮體而吾不得親。就木而吾不得摩。入地而吾不得臨。我之痛懷。宜何時而可已也。念兄前後匍P 匐之誠。幽明之間。負愧多矣。雖然兄我相好之情。不以死生而有間。尙有不相負者存焉。兄亦冥冥之中。必不以此而爲訝矣。其年冬。余始以新恩。哭兄于舊廬。未知兄其知邪否邪。喜邪悲

邪。生者雖榮。死者可哀。魂若有知。必不能無悲矣。平日吾兄弟以立揚相勸。魂若有知。亦不能無喜矣。嗚呼。天乎鬼乎。世之紛紛者流。穢其中而芬其華。得決大科之程。便登青雲之路。朱丹其轂。亦白其首。而奈何使兄之才。困於老司馬。又折五十年之浮生乎。凡人之死病。沈綿牀席。P左妻子右親屬。握手丁寧。一言相訣。存亡之間。猶不堪其痛。况兄之病劇昏絕。瞥然如風燭之吹於一瞬之頃。妻子不得承遺命。親屬不得聞訣語。世寧有此酷邪。嗚呼痛哉。月城金斯文貫之兄。亂離中以宮官奉命赴瀋陽。風塵塞外。一別萬里。吾與兄未嘗不憫嘿以爲憂也。豈知異域濱死者生還故國。而丘園安臥者。遽至溘然乎。死生禍福。有不可詳。吾何從而問此理也。有妻宿恙。有女新嫁。兄獨去此而何歸乎。親朋咸慟。僮僕羣號。兄安所忍而冥若不聞邪。抑兄P都不省在世者之悲。而歸於泉壤之下。融融之樂。將無異於人世。而在世者不能忘情。噉焉而浪自悲邪。所幸兄之家事。伯季氏尚能經紀。螟蛉一子。庶幾謹守墳塋。香火無缺。靈豈不知。嗚呼。我操雅琴。聽者其誰。平生歡笑。一夢依稀。林泉助愴。雲物共悲。罄我哀誠。酌兄一爵。嗚呼已矣。兄之再暮前二日。望久來哭。

祭姊兄李上舍 學 文

惟公。眞城甲族。南國碩士。端重其姿。溫醇其氣。常棣聯華。三璧輝目。中遭急難。鴈行飄落。上奉P庭訓。下念門衰。小成非榮。立揚是期。刮劓頹惰。誦習經傳。勇於敢爲。老而不倦。芹宮攻苦。幾度春秋。匪我不力。命途崎嶇。鵬程竟阻。楚璞空泣。視世之人。樞貌蠟質。青紫其身。朱丹其轂。公獨泥塗。寧不慨歎。猶謂閒居。保享遐筭。何意奄忽。遽卽泉下。壽纔半百。名止上舍。羅隱不第。鄧攸無兒。天乎鬼乎。此理難知。嗚呼哀哉。少小相逢。託爲兄弟。情同骨肉。學共勉勵。秋月春風。論文講藝。科場追逐。罇酒團圓。合散無常。憂樂多端。甲申禍患。嗚咽忍言。未死孤生。孑然獨存。惟幸P有兄。遲暮相依。浮生易促。兄又長辭。人間萬事。雨散雲飛。念兄晚年。常苦河魚。醫藥失時。將理太疎。余有隱憂。戒以毋忽。治療之方。每見輒勸。言意丁寧。兄何不省。一椀冷漿。本非對證。千金軀命。胡莫自愛。膏肓已痼。攻達無賴。斯人斯疾。奈何于天。嗚呼哀哉。丁亥夏初。暫設壽筵。兄亦提壺。來會獻酌。相對抒懷。悲喜俱極。入夜聯枕。觥頂交跖。感念平昔。握手涕泣。數日同處。察兄神色。顏貌羸悴。眞元銷鑠。中心憂憫。脉脉相別。睽離未久。余有職名。兄以尺書。慰我遠行。一入P國門。音問杳然。鄉書忽至。凶報遽傳。解手背面。纔過數月。豈意此別。便成永訣。南望搥膺。涕霽心折。其年季冬。轉赴湖幕。歲時受暇。來到鄉曲。扶挈還任。行色忙迫。瞻望故宅。不遑奔哭。關山千里。薄宦纏縛。江月幾鼓。墳草已宿。年光易適。人事久闕。春未歸田。病不離身。閉門却掃。一枕長呻。阿堵之患。近又作苦。再暮載臨。未由躬赴。情乖始終。義斷存歿。我痛我恨。曷其有極。嗚呼痛哉。青山白雲。卜兄玄宅。螟蛉一子。香火有託。兄其奚憾。我自浪悲。一慟荒塋。竊計他時。如無P病憂。豈敢差池。和淚緘辭。遠寄靈帷。文無次叙。醪單饌薄。惟此哀誠。庶通冥漠。嗚呼痛哉。

祭尹君元賓文

已虘元賓。此生不可復見面目矣。自子落南。芳隣是託。衡茅相望。情好彌篤。青山白水之間。我往

子來。秋月春風之時。握手彈盃。合必盡歡而去。去必有書而相問。屈指于今。已是三十年故舊。而豈意轉頭之頃。人事之有不可恃歟。半百除二。霜摧玉芝。天高鬼惡。其理莫知。楚澤餘形。尚保人間。雲鄉僂馭。冥漠難攀。有言而無與語。P 出門而無所適。吾安得不長呼痛哭也。已虘元賓。才足以乘一障。辯足以談當世。而不遇於時。草萊淪沒。何命之薄而何壽之嗇邪。子之病革。往候牀褥。慰叙移晷。中自憫嘿。誰知一別。永阻再覲。湖天漠漠。牙壠迢迢。豈不懷歸。旅魂飄搖。元方季方。遠來經紀。曩然三孤。益我涕泗。行期已卜。子不少留。故宅荒涼。往事悠悠。山顰水咽。葉落風愁。靈輻就道。迫在再明。病未哭送。倩奠一觥。感念存亡。伏枕垂淚。已虘元賓。子其行矣。嗚呼哀哉。

祭護軍舅氏文

嗚呼。惟我舅氏。愷悌之姿。端良之質。孝友於一家。敦睦於九族。誠心以待人。和氣以接物。鄉隣服其雅操。遠方聳其令聞。惟我舅氏之懿德美行。天之所以賦與者。似非偶然。雖使之升諸公而才不讓於百僚。吏于邑而惠可施於一方。奈何既賦與以懿德美行。而終不得出而試於世邪。晚年一官。亦非舅氏之所樂。而親友有惜其才而勸筮仕。黽勉遊宦。旋返初服。優游自得。送老林泉。其視穢其中芬其華而得志於當世。朱P 丹其車轂。白首於風塵者。不啻若黃鵠之於壤蟲。則豈以吾舅氏之懿德美行。不得試於世者。爲慨然於懷也。而况老星之光。照耀於南極。萊衣之舞。凌亂於北堂。丹穴之瑞毛新長。碧梧之祥鸞併峙。聖念遠軫於優老。恩光幸及於卧牀。泉路歸日。粉書輝煌。人間福祿之盛。未有過於吾舅氏者也。至於始終之有理。寄歸之難免。衣冠藏於黃壤。魂魄遊於白雲。以吾舅氏之平日明達。必無憾於觀化之日。而甥之感舊傷今。噉然而號。泫然而淚者。寧有已也。嗚呼痛哉。P 吾慈氏在世之日。舅氏時以匹馬來會。團圓之樂。夜以繼晝。合堂笑語之聲。至今琅然在耳。孤露此生。仰舅氏如吾母。舅氏之視甥猶親子。而不肖之甥。既非宅相之賢。又無渭陽之情。風埃奔走。世累汨沒。不得頻侍杖履於水石之間。豈料遽抱無涯之痛邪。嗚呼傷哉。去歲冬初。拜候牀席之下。竊審其精神之不變。言語之如常。私情默禱而迴。擬以今年春。策馬再進。親承警欬。此計差池。幽明永隔。訣不及屬纊。哭不得憑棺。此恨此痛。宜何時而可忘邪。嗚呼。天地逆旅。光P 陰風燭。生也何喜。死也何戚。甥亦年來齒髮日益衰。氣血日益耗。住世能復幾何。終當隨吾慈氏吾舅氏。陪遊於地下。融融其樂。將不減於人世。舅氏其知之也邪。其不知也邪。卽遠有期。日吉辰良。葶功咸集。奠羞芬芳。靈無顧戀。萬歲有宅。惟餘故居。秋草冪歷。山顰水咽。月冷風悲。伏哭柩前。有淚霑衣。單盃薄奠。曷罄寸心。不昧者存。庶幾俯歆。嗚呼哀哉。

祭柳甥時彥 重河 文

嗚呼。明日是君長逝之日也。歲運循環。感天時P 之來復。人生倏忽。何一去而莫迴。嗚呼。端良之質。孝友之性。溫恭之容。清朗之氣。天之所賦於君者。似非偶然。胡使之埋沒於草莽。而又奪其壽。瞥然風燭於一瞬之頃邪。譬如幽蘭欲茂而還摧。瑞鵠暫耀而終闕。追之無見。嗟之無及。但儻怳戀想而不能忘焉耳。嗚呼惜哉。自君之玉潤于吾家。殆三十年。未嘗見有一言之失一行之缺。熟知君爲不易得之佳士。吾所以親愛之倚重之者。豈但舅甥之間而已哉。一塊腐肉。生在人世。年來衰病侵尋。憂冗多

梗。因循時月。尙^P未果往哭。今將撤筵之日。又不獲躬奠一觴。以抒余哀。老境人事。雖與少壯有異。揆之情義。長恨曷極。嗚呼痛哉。翁孀在堂。兄弟無恙。羸病之孀。軀命幸保。螟蛉之子。成長可冀。而况脩短前定。始終有理。人無老少。畢竟同歸於泉裏。君若有知。亦應自慰。往事如夢。墳草已宿。松月含悽。湖波流咽。緘辭遠寄。老淚霑臆。嗚呼傷哉。

祭李子愼文

嗟嗟子愼。而至斯邪。忠厚之質。豁達之資。豪俊之才。明敏之學。天既生之。天又奪之。胡爲而來。^P胡爲而歸。半百加七。霜摧玉芝。何壽之嗇。何禍之酷。仁者未必壽。善者未必福。何此理之顛倒邪。嗚呼哀哉。子自童稚之年。聰明穎悟。不勞教誨。而學業日進。至於家庭間。動容周旋。靡不中矩。余固偉其特出于等夷也。及至弱冠。芳聞藹然。戰藝京師。手採雙蓮。中歲以後。高攀桂天。人皆謂朝得碩士。長途發軔。自茲伊始。則入而爲臺閣耳目之官。出而爲旬宣節制之任。爲卿也爲相也。以子之才之學。何往而不得其用哉。嗚呼。時命大謬。柄鑿不入。半腸路險。宦海波動。朱^P門邈邈。上無吹噓之力。白眼睽睽。下多嫉妬之輩。千里之驥足空墊。六月之鵬翼未舉。卒至沈於下寮。困不得意。蠖屈泥塗。鸞棲枳棘。三州簿領之間。十年湖海之外。歲月荏苒。名位蹉跎。秋霜入鏡。鬢鬢盡白。子之顏貌。已覺非昔時矣。歸田之後。世念益灰。尋煙霞之舊棲。伴猿鶴而長終。子之晚節雲臥之計。固已堅矣。而鴻臚之命。又是天恩。則江湖二憂之餘分。義有不可退伏。幡然一起。卜日西邁。來過山齋。告余以行。青燈雪窻。白首相對。話別深更。疊疊忘寢。流行坎^P止。誠以慎重。解手背面。遂成弦矢。時憑北來之魚。以慰相思之抱。俄聞遞職。日望遄回。不幸旅寓中。憂患纏綿。抽身未易。託迹軍門。豈子之所樂哉。秋風季鷹之興。子已熟思之。而余亦以還守東岡陂一語及於書中。書未達而子之病已革矣。豈料一臥經旬。遽至奄忽於千里之外也。去冬山齋一別。是乃永訣之日邪。寒江一棹。丹旄翩翩。嶺雲關樹。飄拂於歸櫬。行路亦爲之隕淚。况一家親屬之情乎。嗚呼痛哉。子之稟氣壯健。素無疾病。而年來毛血早衰。容顏頗悴。猶不^P以藥餌調養爲意。余常竊以爲憂矣。一入都門。世故纏縛。觸冒暑熱。勞頓致傷。眞元內鑠。轉入難醫之域。噫其竟以此而殞其生乎。抑別有疾而至於斯邪。世之羊質虎皮之徒。恃勢冒祿。濫據臚仕。朱丹其馭。金玉其鬢者。滔滔皆是。而子何獨位不稱其德。年不滿六麥。齋志而湮沒。使我抱無涯之痛邪。嗚呼惜哉。顧余義託葭莩。情猶骨肉。相親之深。相愛之篤。科場出入。鄉里游從。自青陽而到白首。未嘗不與子同之也。離則必合。合必戰舌。盡歡而罷。不見子久者。惟子之^P遠宦時爲然。况子之友于情至。頻訪病姊於弊廬。或至經宿而去。今則子之蹤跡斷矣。子之影響邈矣。鳶魚亭詩酒舊遊。俛仰陳迹矣。冰月堂琴歌盛筵。寂寞春夢矣。我言誰和。我懷誰釋。臨風一慟。萬事已矣。嗚呼。天地逆旅。光陰風燭。生也何喜。死也何戚。余亦行年已滿七旬。且遭膝下之慘。禍患荐臻。老淚無乾。形神日益昏悴。齒髮日益衰落。住世能復幾何。畢竟同歸。浪悲何益。霞山先壠之側。卜子萬歲之宅。卽遠有期。日吉辰良。葶功咸集。奠羞芬芳。鯉庭在茲。萱闈孔^P邁。螟蛉一子。典刑宛似。伯仲兩兄。經紀襄事。子其行矣。何憾何傷。鴉啼古木。雪滿寒岡。風雲慘慘。松栢蒼蒼。緘辭代奠。瞻望灑泣。靈其有知。庶歆一酌。嗚呼哀哉。

孤松集附錄上

通訓大夫行司諫院正言孤松申先生行狀[李光庭]

公諱弘望字望久。申氏系出鵝洲。勝國時有諱允濡。事忠烈王有名。官至版圖判書。其子祐。全羅道按廉使。有至行。父喪居廬。有雙竹之異。今尚州丹密縣。有孝子碑尸祝之祠。入我朝世有衣冠。高祖翰贈判決事。曾祖應奎恭陵參奉贈工曹參判。祖夢得贈左承旨。考諱之悌號梧峯。有碩德重望。官^P至同副承旨。贈吏曹參判。妣貞夫人咸安趙氏。贈刑曹判書址之女也。始參判公無子。神夢公。天以爾積善。畀而子以叶女望。生卽以望字若兒。公果以萬曆庚子五月七日生。幼豪縱不羈。十二歲以參判公命。謁敬亭李公民戎。李公適入內。案有新粧書卷未題目。公卽取筆揮寫。李公還見訊其實。乃笑曰常怪而翁晚得若。課督之甚嚴。今見若豪放。以此故也。稍長厲志飭行。奉庭訓惟謹。博涉經史。尤喜昌黎文。日誦讀不輟。爲文詞。下筆^P滔滔不窮。大小鄉舉。莫與爲先。事父母愛敬俱至。甲子喪參判公。哀毀踰禮。三年酒漿不入口。奉母夫人怡愉承志。滄澗無闕。丁卯中進士。以不及先公時爲悲。對賀者輒出涕。戊寅以行薦除康陵參奉不赴。公自得司馬。無進取意。以母夫人命僱勉赴試。己卯擢別科第五名。朝中見者咸嘖嘖曰眞賢父子也。補大學官。李相公聖求惜之。語人曰此子當貯之金馬。豈可任散員邪。卽薦翰院。一當路止之曰此人名望藉甚。自宜有公論。何如是^P汲汲援引乎。蓋陽浮慕之。實擠之也。公素慎痘。且不欲離親遠遊。家居凡六年。甲申四月。始除承政院注書兼春秋館記事官。應對通敏。筆翰如流。仁廟器之。眷注日隆。而母夫人時年八十二歲矣。公陳疏乞省疾。上許之。以錦囊貯各種臘藥。且出青扇一令歸遺母。異數也。乙酉二月。赴召至漢江。間遞卽還。丙戌二月陞典籍。卽遷兵曹佐郎。五月拜司諫院正言。正色立朝。百僚聳歎。旋遞授禮曹佐郎。數月棄歸。丁亥秋又還正言。公以母^P夫人年益高。無意遠宦。母夫人嘗從參判公通判全州。語公曰全州有汝父遺蹟。汝若繼判是州。吾欲隨汝一往。時趙龍洲綱判銓曹聞之。卽調公全州。命下儕友咸惜其出。謂不當去朝廷。汲汲求外補。公歎曰吾之僱勉久矣。吾親年薄日索。得一日養。爲人子一日之榮。又全州先君子所曾莅者。遺愛猶存。吾遵其迹而益勉之。無忝先人之烈。是猶爲行其志也。諸公咸嗟歎。爲詩若序以道其孝思。李時楷爲全羅監司。見公神采。不覺灑然起^P敬曰。觀判官眉宇。使人鄙滯自澤。公衙罷必入侍母夫人。怡愉婉順。衣食之須。凡可以便體適口者。靡不曲盡。其爲政一躡先迹。清於奉己。勤於撫字。全幅廣民悍。詞訟甚繁。而公盡心酬酢。剖決無滯。及歸闔境追思之。爲刻公政績于參判公遺愛碑陰。傳者以爲美談。庚寅母夫人以天年終。公已過始衰之年。而猶烝烝哀慕。喪祭一遵禮節。壬辰服闋。秋拜司憲府持平。孝廟卽位之四年也。李時樸素居官不廉。居喪不謹。國言不已。李溫爲持^P平發論完席。將啓爲同僚所沮。竄抹緊語。繼被院駁以去。及時樸拜都承旨。累疏自明。有誣引先賢語。士流齊憤。公時在告將舉劾。同列畏時樸固止之。且曰君已錄弘文。朝議方擬君校理。此啓一出。進塗塞矣。公笑曰窮通命也。吾不能效轅下駒。遂獨啓曰臣伏見前都承旨李時樸辭疏中。有曰居官不廉。居喪不謹。昔賢先正。亦多被誣云者。其言不但專指一賢。所謂以不廉被誣者何賢。以不謹被誣者何賢。而所謂誣賢者何人。士林^P間曾所未聞者。時樸獨聞於何處乎。青天白日。奴隸亦知其清明。尊賢尙德之心。人孰無之。而時樸至以不忍加之說。忍加於先賢者。是何心也。雖曰被誣云。而誣賢者實時樸也。時樸重被臺彈。回視平生。宜有忸怩於顏者。而不知杜門省愆。迺敢侮辱先賢。妄自引喻。爲辨明之證。言行不謹。得罪名教。請命削去仕版。上不允。於是院啓駁罷公。公卽還居九日。禁府人來。竄公碧潼。渾室號咽。公呵止之。怡然就寢。明日拜辭祠堂而行。至漢^P津聞上因領相筭。令該司從容押去。至弘濟院。有付處之命。兩司請還收。上不許。正言鄭斗卿疏論。嶺南人見語犯先賢者。則必憤起而攻斥之。申弘望之言。

非黨論云。兩司停啓。公付處平海。未幾因理冤獄蒙赦。在平海凡二十六日。既還鄉里來慰。公歎曰臣罪大矣。天日下臨。雷霈荐降。減等而免絕塞之苦。蒙宥而脫瘴海之毒。鬼門餘生。歸對妻孥。恩罔極也。未絕之前。何以報答。丙申冬。始除蔚山府使。蔚素號難治。公視事一^P月。政刑修舉。令出而民信。訪革海瘼。蜺戶蘇息。戊戌以事罷。蔚產水晶。公在官常治一纓。及還解付重記。歸裝只有松木硯匣制甚樸。至今藏于家云。蔚山有清德碑。己亥春。除豐基郡守。前郡守三人連死于官。人以豐爲不祥。公曰妖言惑衆。吾不就官。無以解也。遂赴。簿書之暇。專以勸課人士爲務。秋設監試于豐。豐爲同道。子弟當赴試。掌試皆公故人。公命赴京試。郡人有金潤章者家貧。父日拾松子。令夜讀書艱苦甚。公憐之。召置衙中。供給^P衣食。勸課甚勤。其明年金登第。卽補昌樂丞。盛具甘旨進其父。父輒持詣獻公曰兒之得遂。明府力也。敢獨饗乎。數年投絃而歸。行橐無一物隨。惟紅梅一盆而已。自是詩酒自娛。有優游卒歲之志。顯廟癸卯。除江原道都事。公不欲赴。有以楓嶽宿債告公者。強趨肅。既至遞授成均館司藝。謝恩卽還。甲辰除宗簿寺正兼春秋館編修官。辛亥除承文院判校。兼如故。俱不赴。癸丑正月二十二日。微疾終于家。享年七十四。訃聞朝廷致賻如^P禮。某月某日。葬于義城縣下川黑石里已向原。李夫人塋下。公器度寬偉。見識平實。居家以孝悌爲本。接人以忠恕爲主。言論持正。未嘗曲隨。常行己志。自爲布衣時。名譽籍甚。雖未曾目及公者。輒信其耳聞。以爲篤行君子也。公卿間有欲自明者。亦籍公爲說。公雖爲親屈首舉業。而未嘗以得失爲心。律己清謹。既釋褐。斂迹權貴之門。許相積性行偏狹。家道乖戾。公疾其爲。不與來往。朝班相對。未嘗開心敘話。方壬辰嚴譴。知舊相屬唁慰。許^P公乘醉過。作色公曰何率爾也。蓋恨其不相議。遽進彈章也。公不以介意。綺紈家慕聲請與婚者。公不肯。居官清苦。家人嘗索醬鹽。公命責之奴。決訟得者例獻布。公曰此一時守令所擅用者。何爲受之。歷典三邑。累決大訟。而終不問其布焉。平居惰慢之氣。不設身體。雖倉卒無疾言遽色。怒詈捶楚不及於婢僕。奉祀接賓。單心單力。每值忌日。前期齋沐。悲戚滿容。朝夕展謁家廟。朔望必設奠。嘗避痘鷹洞齋舍。是參判公平日養病之所也。林亭^P谿谷。杖履所及。窻牖牆壁。手墨猶存。公徘徊摩挲。嗚咽淚落。考妣墳塋。距家六十里。源源往省。不辟寒暑。嘗病歲時未得展。呼筆述悲。情見于詩。教子弟必以義方。諄諄開譬。凡於居家行己爲學事君之道。反覆纖悉。日夜不倦。令內外子孫常習揖讓進退之節。一家子弟每進見。不敢有懈怠容。慈詳喜施與。親戚之貧無依者。絕甘分少。賙卹甚勤。人有死喪。隨力救之如不及。見衰絰者。惻然動容。未嘗對食喫肉。與鄉人處。色和言溫。雖閭里寒微^P之人。待之咸得其心。聞人有寸長片善。必稱道以獎其志。人樂親附。所居龜尾村。巒麓周遭。洞壑深邃。前有池沼。嘉樹挺列。依然輞川盤谷之勝。宅南有小麓橫迤。盤松一株。蒼鬱可愛。仍自號孤松。每趁良辰令節。輒召隣里。觴詠自適。居第之側有小堂。扁以樂善。顧子孫曰吾欲汝曹。無爲不善也。容姿炯秀。襟韻灑脫。鶴沙金公贈序。謂之百丈山頭一玉。千頃波面一月。眞箇玉皇香案吏者。眞傳神也。嘗遊旅軒張先生之門。先生稱之曰申某眉^P間常有春風和氣。觀其言貌舉止。可謂克世其家者也。世之知公者。無不以公輔期之。及其論時襟。爲異己者所擠。不復廁跡於清班以卒。人莫不爲公嗟惜。而非公之恨也。公娶永川李氏。參判民奩之女。觀察使光俊之孫。有淑德懿行。先公二年而卒。有一男八女。男漢老宣教郎。以文詞世其家。不幸早卒。女士人柳重河。金時任。進士李朝衡。士人任世準。都爾高。權然。朴文約。縣監朴望之爲其壻。側室子漢傑。漢伯。女二人。宣教四男叔範。叔篋^P叔筭。叔篋。三女適李之煜生員。柳聖時。李華。柳重河有繼子後康生員。金時任一女適琴羲操。李朝衡四男壽民。壽仁生員。壽均。壽春。五女適李鳳周。安龜石生員。權暹。鄭泰禧。趙是明。任世準三男宇樑。宇楹。宇柱。都爾高三男萬春。萬夏。萬秋。權然一男又經。三女適金壽萬。李良佐生員。趙汝益。朴文約四男潭。瀟。澣。濼。四女適權斗運。李德祚。成世球。金元燁。朴望之三男世元。世亨。世貞。

漢傑五男叔箴武科，叔箴，叔箴，叔簡，叔箴。女朴昌彬。漢伯三^P男叔箴，叔箴，叔箴。女柳後增武科。內外曾玄至八百餘人。公嘗言世俗爲親巧人文字以張皇。召後世之譏議。我死只記世系官次以表墓道。無求於人可也。公之子孫不敢違。既依戒樹碣。公會孫上舍震龜氏又懼公言之終不表見於世也。乃就公日記及家藏遺事。草成行錄一編及公遺集若干卷。使光庭有所撰次而爲之狀。顧光庭生也後。於公平生。實無一二見得者。而且樸駭無文。何敢縣揣妄論。以犯公遺戒。而自託於傳信之地哉。^P第今距公棄世六十餘年之間。其遺風餘韻。士大夫猶志之不衰。論嶺中先輩之可爲後世師範者。公名必在其間。則至行懿蹟。沒而不出。不但爲公後孫之遺恨而已。上舍君之狀事核而辭不盡。又若信而可徵者。既辭之不得則迺就其中而稍隱括裁定。以慰慈孫辱逮之意而已。若以是求秉筆者之有所採擇焉。則誠有所不敢者。世之君子。庶或垂恕於斯焉。

上之十四年四月辛卯。通仕郎惠陵奉事李^P光庭謹狀。

墓誌銘 并序 [權相一]

公諱弘望字望久號孤松。同副承旨贈吏曹參判梧峯申公之子。參判公嘗爲禮安守。因歲饑活數千人。得異夢生公。幼而神采炯潔。才氣豪邁。見者稱其遠器。受庭訓甚謹。力學爲文。淳澹有餘。丁卯中進士。戊寅薦除康陵參奉不赴。己卯擢別科。初補大學官。李相公聖求惜其才薦翰院。見尼於當路。甲申始除承政院注書。應對通敏。筆翰優瞻。仁^P廟奇之。及由還。賜臘藥及扇遺老母。蓋異數也。丙戌陞典籍。卽遷兵郎。纔數月擢拜司諫院正言。俄遞授禮郎。丁亥又拜正言。爲親養出判完山府。府卽參判公桐鄉也。奉板輿至任。榮養備盡。爲政一循先蹟。境內大治。及歸府民刻銘于先碑之陰。以頌德。壬辰拜司憲府持平。有李時樸素不廉於官。不謹於喪。人言喧藉。持平李溫發啓。旋被院駁以去。及時樸爲都承旨。陳疏自明。且引先賢爲證。聞者憤惋。公將舉劾。同列畏時樸勢。固止之。^P且曰君朝夕且瀛選。言此必塞。公笑而不聽。遂獨啓曰時樸疏有曰不廉不謹。昔賢亦多被誣。所謂被誣者何賢。誣賢者亦何人。時樸重被臺彈。不杜門省愆。敢妄自引喻。侮辱先賢。請削版。上不允。於是諫院駁罷。如李溫。公卽出城而還。未幾竄碧潼。家人皆號泣。公不少動。怡然就寢。翌曉辭家廟行。比至弘濟院。特命付處。兩司請還收。上不許。公改路赴平海配所。未一月赦還。丙申除蔚山府。律己清簡。革祛弊瘼。民立碑寓去思。己亥^P除豐基守。先是邑宰三人連歿官。皆曰不祥。公言吾不就官。無以解妖言。遂赴任。郡僻無事。以訓士興學爲務。留數歲棄歸。行橐蕭然。惟紅梅一盆。癸卯授關東幕。改授司藝。謝恩而還。後除宗簿正判校等職。俱不赴。生庚子歿癸丑。享年七十四。訃聞朝廷致賻如禮。某月日。葬于義城縣下川黑石里已向之原。公天性篤孝。歲甲子。參判公捐館。公哀毀躅制。三年不飲酒漿。登科以不及於先公在時。賀者至輒出涕。及遭先夫人喪。年既衰。猶^P執喪不懈。數省墓。不避寒暑。朝夕謁家廟。忌日齋沐悲慟。終身如一日。平居無惰慢氣。無疾言遽色。教子孫必以禮法。待親戚。鄉鄰皆曲有恩意。而尤恤孤貧褒善行。噫公之文學足以揚明廷。宏器碩德足以贊鴻猷敦薄俗。而畢竟爲權貴所擠。沈淪於冗散郡邑而止。宅畔有孤松蒼鬱。公嘗取以爲號。榜其堂曰樂善。此可見其平生也。申氏系出鵝洲。有諱允濡仕高麗版圖判書。諱祐有孝行旋閩。官至按廉使。曾祖諱應奎贈工曹參判。祖^P諱夢得贈左承旨。考卽梧峯公諱之悌。妣貞夫人咸安趙氏。贈判書址之女。公娶永川李氏。父參判民賓。祖觀察使光俊。淑人生於簪纓家。淑德懿行。有古女士風。先公二歲而歿。葬于同塋。子男一人宣教郎漢老。女八人柳重河，金時任，進士李朝衡，任世準，都爾高，權然，朴文約，縣監朴望之其壻也。

側室子漢傑，漢伯。宣教有四男叔範，叔簾，叔筵，叔箴。三女適生員李之煜，柳聖時，李華。內外曾玄至八百餘人。多不能盡錄。公之曾孫上舍震龜。以李奉事光庭狀。請誌墓。相一累辭不獲。謹按狀而掇其大者。序以銘之。銘曰。

克孝且廉。梧峯之嗣。雖蹟不渝。孤松之翠。既豐其有。胡嗇其位。維身退野。維言扶紀。曾玄百千。寔天攸賜。崇丘有藏。毋敢傷毀。

己未七月日。通訓大夫前行司憲府掌令權相一謹撰。

孤松集附錄下

送完山半刺赴任所 并序 [金應祖 鶴沙]

嘗誦西厓柳先生無親無君非孝非忠之句。以爲事親而後可以事君。盡孝而後可以盡忠。君親固一體也。忠孝固一事也。今天曹長趙公秉銓衡纔數月。初以金君貫之倅順天。中以趙君士靜伯嶺南。終以申君望久爲完山判官。人皆以爲失政。金趙兩君事。得失未暇論。余愛望久容資灑灑。襟韻飄飄。所謂百丈山頭一玉也。千頃波面一月也。眞箇玉皇香案吏。豈宜厄之於米鹽升斗之間歟。顧望久今年四十八歲。大夫人今年八十五歲。噫望久事君事親之日。果孰長而孰短哉。趙相今既令望久孝於親矣。他日豈不能令望久忠於君哉。由此言之。銓曹今日注擬。雖謂之得焉可也。而況完山是望久先世桐鄉也。戲彩之暇。對舊民理舊政。其夙興夜寐。思所以無忝者可知。是亦所以忠於君。豈獨孝於親而已哉。若余不天誰爲孝。不才無以忠。只君親一念。炳然如丹。於望久之行。不覺感淚自迸。乃序而詩之。

舉舉南州第一人。安陽奉檄爲偏親。板輿再駕膺新慶。稚子重來莅舊民。堂下彩衣光絢旭。臘前花柳暖回春。感君此去恩榮溢。孤露餘生只愴神。

送申正言之任全州判官序[黃辰 漫浪]

繁湖以南。故我右壤。而惟全爲府。實大都會。斯朝廷難其尹若貳焉。迺今聖上敦錫類之政。而有司斤斤體行。前數月亞卿朴公爲其大夫人之養而以尹往。而給諫申君又乞養得貳。凡薦紳士知朴公者。謂公推其爲親者而及貳。卽其貳之所以養者。不以貳而有異也。知申君者。謂君推其爲親者而及民。卽其民且有所觀感而興于懷也。申君將行。其友昌原黃辰問曰子之養也。將以甘旨歟。以被服之美歟。抑以鐘鼓絲竹之盛歟。夫全固有珍錯焉。有繭絲焉。有管絃之伎焉。然此謠俗所好已耳。皆不足以悅親而當孝子之心者。吾將薦崑崙之桃。羞丹山之鳳。織扶桑之繭。使帝女爲服。奏勾天之曲。間以霓裳羽衣。界子養焉可乎。雖然吾恐大夫人之樂。不在斯也。不佞竊聞大夫人有女士風。其訓子也。自在外傳。能屈首受業。而日期而如先君。及其籍登博士。奮然以經術鳴。而日期而如先君。及其策名王庭。服官就列。而日期而如先君。矧今出而從政而先大夫嘗莅是任。則其期乎君者。尤當惓惓也。抑又聞先大夫爲政於全。距今幾五十年所。亡論清名勒石。卽有長老之口碑存。匪獨外政爲茂。尙誦其內相之懿。

全民之望于子。亦豈淺淺哉。嗟乎。P人以所處殊務而爲母之道。隨而異焉。農春舍于郊。秋荷擔而入。以困倉爲務者也。賈子逐利萬里之外。賈巴蜀則以錦歸。賈荊楊則以金歸。以篋笥爲務者也。儒者積學而起家。袂躬以許主。困倉倒不爲羞。篋笥空不爲訕。以修身爲務者也。故農媪喜穀。賈媪喜貨。儒媪喜修。大夫人家世業儒。其喜之在此而不在彼固爾。且也世以羶薌謂孝。鍾鼎謂榮。此又不佞非所望于子也。今子奉大夫人以往。踐先大夫之位。事尹而無違諸禮。拊民而克P盡其誠。一如先大夫之爲者。而于光有烈。則大夫人之志。有不樂者歟樂矣。有不安者歟安矣。既樂且安。斯謂志養。全民猶古民也。其必謳謠如先大夫時。而且曰我公有子。我有二天。夫全民不下數萬戶。戶又不下二三男婦。以累萬人而祝大夫人壽。用一人祝而添一齡之籌。余竊必之。卽以百計不啻也。不佞辰瞻望南極。頂禮老星。

送申望久通判完山序[申悅道 懶齋]

士君子立揚斯世。惟忠與孝而已。匪孝無以P事親。匪忠無以事君。孝者忠之本而忠者孝之推也。余之同宗友申君望久。才華聞望。迥出流輩。是宜翱翔臺閣。黼黻王猷。而顧大碩人年齡逾八望九。眞所謂事君日長。事親日短。望久愛日之誠。至此而曷有窮已哉。望久惟汲汲於便養。不憚屈首於幕佐。出爲完山半刺。凡我同人。莫不爲望久嗟惜。而望久獨欣欣然有喜色。余於是知望久孝誠之天出。而果非凡人之所可及也。且完山乃先大夫之桐鄉。而深仁厚澤。浹於完民。逾久而不P能忘焉。今望久之往也。入而事大碩人。養志養體。盡其懽愉之道。出而臨乎民。嚴明仁恕。一遵先大夫之餘矩。老吾老以及人之老。推吾孝以勸人之孝。將見完之一境。咸囿於孝理之化。可以趾美於先大夫。而完民亦將曰先大夫有子。豈不休哉。豈不休哉。他日還朝。移孝爲忠。而忠孝兩盡。則益有光於先大夫大碩人矣。望久勉之哉勉之哉。噫孤露餘生。永懷風樹之痛。欲爲孝誰爲孝。今日職分。在於盡忠。而衰邁日甚。齒髮遽如許矣。安得P如望久之兩盡忠孝。報君親罔極之鴻恩也邪。祖筵解攜。不覺感淚之自零。遂書之以爲送別序。

送申望久通判完山 并序 [李元圭 鋤谷]

今之仕者。例以外內作輕重。以爲一時之榮悴焉。吾見之矣。吾友申望久曾以正言遷禮部。未幾。朝廷且復引入。浸浸然用之。適全州判官缺。望久喟然曰吾之僦勉亦久矣。吾有老親在堂。得一日養是爲榮。吾肯以彼易此哉。遂懇求外如其願。朝廷惜其去而不P能得。將行余執手而言曰。噫吾所云。非世所謂者。今之判官。卽古之通判。全爲邑大而爲豐沛鄉。諸郡縣莫與等焉。有監司焉。有府尹焉。判官眇然處其中。貳於尹以佐之。其事之虔。若卑者之承尊貴。晨輒具冠帶問起居。退而省朝夕膳。食已出日以爲常。少有毫髮慢。卽訶責至。至使人有不能堪者。吾恐子之不能是也。望久曰然。然吾聞之。君子素其位而行。無入而不自得。又曰苟存心於愛物。必有所濟。然則今吾之行。豈獨爲榮養而已。將以P行吾道也。況邑是先君子所嘗履者。至于今遺愛在民。民思之若父母焉。苟吾之克遵其成法。無忝先人蹟。是其道之行也。彼世所謂者。固不足道。又何有於子所云。余曰子之言善。吾不如也。子其行矣。係以詩以臚之。

豐沛山河第一州。送君今日意悠悠。承恩卽見全忠孝。惜別休言各去留。地勢坼分湖北口。天形低壓海南頭。春來千樹桃花發。倘記玄都舊客不。

祭文[柳元之 拙齋]

○ 惟公奎壁挺輝。金玉其相。文雅夙成。令聞幼彰。飲人以和。德容溫溫。望表知裏。可見所存。名科奄俊。翰墨蜚英。牛刀製錦。伏蒲分涇。位不滿器。施者不延。不容何病。道亦無愆。十年居貞。修養之真。簞瓢有味。花柳契神。鄉隣追軌。士類增式。世道是賴。元氣攸託。謂當神勞。永受胡福。云胡不憊。而有今日。余以空疎。荷公不棄。奉而周旋。積有年紀。敬信互用。情意相於。夫豈或間。揆分莫如。零落具盡。昔人所悲。矧伊垂死。歎極吾衰。聞公之葬。義當匍匐。○ 危喘如綫。欲行不得。緘辭代酌。詎盡心曲。公如有知。庶賜歆格。

祭文[李之煜]

嗚呼。世之有才德聞望之士。終不能闊一步超一階。而壽亦不得者何限。公以金玉之質。卓犖之器。手攀蓮桂。足躡雲衢。歷清要按州縣。且壽躡稀齡而有子若孫。衍宇充堂。其視世之有才而無祿者。宜若無欲然。而公之歿也。小子所以深痛而涕無從者。非獨爲私而已。痛斯世之不復見如公者也。嗟夫公之生○ 非偶然也。先令公梧峯先生蘊百行之源。爲一代之宗。積善累仁。感應於天。夢覲神人。告以吉祥。則公之生非偶然也的矣。公天資粹美。氣宇清高。早業文章。博通羣書。抽思下筆。不屑爲尋常科臼之文。燦爛錦繡之華。炳烺龍虎之章。自可以輝映一時。聳動百代。而公以爲吾人大業。不在於此。恭承庭訓。用力罔愆。孝敬以爲本。忠信以爲主。持心也公而明。律己也清而直。在朝廷則危言讜論。不避權奸。在郡邑則仁政惠澤。浹洽民庶。此公之素○ 所蓄積而不容強勉者也。以公之才之德。可以贊績於巖廊。垂名於竹帛。而時之不遇。竟不大用。至使補袞之手。支廈之材。不得久於朝而于家。有才而不得展。有德而無所施。則茲豈非世道之不幸也哉。嗚呼哀哉。小子之執贄而贅高門者。于今十有四年矣。棣棣粹盎之貌。溫溫談笑之音。灑灑如水面之月。噦噦若丹丘之鳳。以小子觀之。宜其爲振東方所未有之賢豪也。聽其言觀其行。未嘗不心悅而誠服矣。至愚極魯。未能體一言遵一行。○ 瑣瑣碌碌。不足與有爲。而以惻惻仁愛之心。浩浩包容之量。不以我無似而棄之。諄諄善諭。有若親父兄之詔子弟。至於居家之法。處己之道。爲學之要。事君之節。無一或秘。而盡與之開誨。其所以感發愚蒙。慷慨興起者。爲如何哉。由是小子益感激殞涕。每欲長侍杖履。奉承清誨。而直緣所居闊遠。未得鼎鼎來拜。怠慢不虔。負罪實多。然而每念氣體之康寧。意謂壽考之無彊。而小子之薰染盛德。亦可以無窮期矣。豈料蒼蒼之難恃。漠漠之無○ 信。致令小子竟抱無涯之慟邪。已矣已矣。灑落風月之襟懷。英發動人之言論。將不得復見於斯世矣。嗚呼。卽遠有期。迫在明日。小子後生。于何考德。情溢辭縮。淚隨盃傾。伏惟尊靈。庶鑑微誠。嗚呼哀哉。

輓詞[柳元之]

飲德常如醉。論交更得師。姻連情自切。志合道無緇。鄭重生前好。虛涼夢裏思。哀辭說不盡。只有淚雙垂。

輓詞[金啓光]

高人淪喪路人悲。况我孤生失所依。無復更瞻鸞鳳狀。不堪重廢蓼莪詩。家傳孝友芳聲遠。文出宗師大手揮。始若有爲終斂迹。茫茫天意果難知。

輓詞[羅以俊]

不恥於衰世。吾猶識紫芝。同收畎畝迹。各歎漳濱羸。海內斯人歿。乾坤此道危。平生信宿意。重誦蔡邕碑。

輓詞[南天漢]

風流文彩最南州。黃甲香名更出儔。栢府薇垣清望重。湖城嶺邑惠聲留。世間榮利還多事。老境優游有某丘。鄉國衣冠零落盡。又題公輓淚盈眸。

輓詞[柳世哲]

雄詞華望早蜚英。梧老家庭見典刑。原德正同鸞鵲峙。清姿賸似玉金貞。棲遲晚歲寧論命。歸仰平生幸襲馨。從此儒林長寂寞。龜山煙月摠傷情。

輓詞[柳世翊]

名家模範見箕弓。文彩風流繼有公。鵠質固應非浴白。蘭馨元自襲人濃。明時雅望簪紳早。晚歲閒居木石同。飽德幾曾蒙眷誨。追陪此日更無從。

輓詞[金燧]

明辰早擢諫議臣。鵠立風聲孰敢倫。直節可能挽世道。危言終使誤公身。棲遲嶺邑年先老。投筭丘園

志莫伸。時事邇來堪痛哭。羨君今作地中人。

輓詞[李玄逸 葛庵]

東南人物眇然時。將曉稀星又見移。大令已^P聞於祖厚。家君每語卽公推。摳衣猥荷溫言辱。灑掃常嗟供役遲。賤迹窮山會愁疾。不堪辜負送靈輒。

輓詞[李惟樟 孤山]

少以才鳴晚福全。早辭軒冕臥林泉。隨車甘澤乘晷日。及霽危言躍馬年。田畝養閒神自王。君民入念淚長懸。廟堂知己應銘述。懿德行看國史傳。

輓詞[李惟樟]

夫子南州雅望持。江東安石漢當時。上之合^P在名卿列。窮也堪爲後學師。梅福敢言身不顧。公孫無事酒常隨。死生順適人何憾。獨爲從前分誼悲。祭文，輓詞多遺失。只此若干篇入錄。

樂善堂銘 并序 [李惟樟]

昔孤松先生鵝洲中公。作燕遊之堂于居第之側。扁之以樂善。因有小絕四詩。以詠歌其志。及先生之孫國模氏幹之。改構其第。因堂之舊制而稍輪奐之。以爲歌哭聚國族之所。而其號仍舊焉。嗚呼。人之所可樂者亦多矣。孰有如爲善者乎。自可欲而推之。以至於仰^P不愧俯不忤。則其爲樂何如哉。先生既以是善爲之樂。則未嘗不欲推其所有。與斯人同之也。及世不我以。柄鑿不合。則卷而懷之。甘自託於東平王馬少游之爲。故其發於聲詩者。幽閒冲澹。優游自得。與曾點詠歸之興。司馬獨樂之意。千古一轍。豈世之欣欣於名利。汲汲於富貴。以浮榮外物爲樂者。所可與議哉。先生以是裕諸己而垂之後。國模氏又繼其志而述其事。雖易其堂而新之。猶揭以舊扁。爲盤盂几杖之警。則其遵奉先志。遙追前^P烈之美可見矣。惟樟嘗獲幸於先生之門。服其高義有素。而景貽謀之及於後昆也。於是再拜而爲之銘。銘曰。

我有我善。匪自外得。修之於身。百行具足。體之於心。萬理斯備。善既在我。其樂自至。千駟萬鍾。莫我能易。簞瓢陋巷。隨遇自適。年豐國泰。宿願所繫。白雲青嶂。心豈忘世。用舍行藏。時適然矣。懿歟先生。惟義之視。凡厥後昆。願謚華扁。式穀似之。居之無倦。

昭陽作噩陽月之朔。後學宣城李惟樟謹題。

孤松集跋

文集後識[申震龜]

嗚呼。此吾曾王考孤松府君遺集也。府君蓋嘗有過庭之聞。遺風餘韻。迄于今傳說不衰。文華特其第二件事耳。平生所著述多散逸。傳於家者塵若而篇。故徵士李孤山先生嘗服府君之志行。謂府君遺墨不可泯坳。既抄選其可傳者。又欲置一言于卷空。文未及就。先生遽易簣。仍藏諸巾衍殆至四十餘年。今吾兄弟年迫桑榆。竊恐世代漸遠。遂至湮沒。與堂弟輩殫力僦功。謀所以壽其傳。丁巳春^P堂弟夏龜問序于玉川趙公^{德鄰}。適會公遭彈待命。不敢爲人出一語。其年夏竟卒于耽羅嚴程。噫先輩已盡之矣。今之世獨訥隱李光庭天祥甫執牛耳於騷壇。己未春余遂奉遺集。就見于山齋。對榻討論。整理其訛謬。既歸使族姪致雲繕寫。將繡于梓。於是親戚之爲府君外裔者。亦皆樂聞而相其役。閱數月告訖。嗚呼。府君少日以賦策鳴。遺集亦多。而事鉅力綿。未並付剞劂氏。是可慨也。然崑山片玉。夫豈待多而方爲寶哉。是歲陽月既^P望。曾孫生員震龜謹識。

孤松先生文集跋[權相一]

相一謹讀李孤山所著樂善堂記。竊欽夫松老之盛德懿行。見重於先輩如是其至。又讀李斯文天祥所爲狀若序。益歎公誠梧翁之賢子。而遺文之次第鋟版。並不朽於世。亦非偶然^P也。公幼有雋才逸氣。而又入於家庭壻輔之中。有所成就。器度宏偉。文章滂沛。捷高科登顯仕。進塗若可以大闢。而直簡一發。銛鋒羣起。噫維孝維廉。是公之素性天得。事親而終身哀慕。居官而不以一物自隨。^P唯其在我者如是。故能痛惡人而舉劾不小避。仍有嶺海之行。亦終沈淪於冗散郡邑。不得展布其志業。然公之一言足以扶人紀而補世教。其所以不幸於當時者。乃百世之幸也。相一在鶴城時。過公清德碑。未嘗不起敬興慕。^P而有不及執鞭之恨。迺今公之曾孫上舍震龜甫。要以一言書於卷後。意有所不欲終辭者。謹書所感以歸之。

上之十五年六月丙戌。安東權相一謹跋。